



卷之二十
人物志
宦蹟
上

ル 5
3258
20



門 儿 5
號 3258
卷 20

黃州府志卷之二十

黃州府知府英 啟纂輯

人物志

宦蹟上

陳

黃岡縣

周吳字文昭本汝南安成人祖疆齊太子舍人梁州刺史父靈起梁通直散騎常侍廬桂二州刺史保城縣侯自靈起先世避西晉亂徙永安黃岡遂為永安周氏吳少豪俠任氣有將帥才代為西陽太守封西陵縣伯討侯景有功進爵為侯陳高祖代梁吳與王琳起兵伐之為陳將侯安都所敗見獲陳

黃州府志卷之二十

宦蹟上

昭和十八年
十月八日
購求

世祖釋而用之爲定州刺史兼西陽武昌二郡太守進都督
安蘄江衡司定六州諸軍事改封龍源縣侯會吳入朝定州
刺史田龍升以江北六州七鎮叛入於齊吳討斬之盡復江
北地進號平北將軍定州刺史卒於官贈武昌郡公諡曰壯
子法尙自有傳詳陳書

隋

黃岡縣

周法尙字德邁吳子少果勁有風概好讀兵書爲陳始興王中
兵參軍父卒後監定州事督父本兵數有戰功封山陰縣侯
與長沙王叔堅不相能叔堅譖其將反法尙懼歸於周宣帝
甚優寵之封歸義縣公隋高祖受禪拜巴州刺史破三鵝叛

蠻於鐵山轉黃州總管尋遷永州總管安集嶺南仍給黃州
兵三千五百人爲帳內嶺南州郡皆降其後屢討平叛蠻賞
賚優渥煬帝嗣位轉雲州刺史金紫光祿大夫後爲滄海太
守討羣盜王薄孟讓等卒於軍贈武衛大將軍長子紹基靈
壽令少子紹範最知名詳隋書

唐

黃岡縣

周墀字德升吳五世孫少孤事母孝及進士第官集賢殿學士
長史屬詞高古文宗雅重之李宗閔鎮山南表爲行軍司馬
閒歲召還太和末李訓鄭注亂政以黨誣搢紳紛逐諸名士
獨墀雖嘗爲宗閔所禮亦無以罪也累遷翰林學士武宗卽

位以疾改工部侍郎出刺華州徙江西觀察使劾舉部吏翦捕劇賊進義成節度使封汝南縣男宿將暴警不循令者墀令鞭其背一軍大治以兵部侍郎召判度支進同中書門下平章事宣宗時河南節度使王宰重賂權倖求同平章事領宣武墀言天下大鎮如汴并者幾宰求何可厭帝納之駙馬都尉韋讓求為京兆持不與由是妄進者少衰會議河湟事墀對不合旨罷為劍南節度使駙馬都尉鄭灝言於帝曰世謂墀以直言相亦以直言免帝悟加檢校尚書左僕射卒贈司徒祀鄉賢

詳唐書

麻城縣

閻伯璵進士官袁州刺史時征役繁重袁特殘破伯璵專以惠

化招撫逃亡皆復數年間商旅闡贛州境大治改撫州百姓隨之舟航相繼吏不能止其見愛如此到撫一年撫復大治代宗徵拜戶部侍郎未至卒

唐語林

黃梅縣

魏英字時育以義俠聞為太原兵馬將與高駢友善子元術尤稱機警王僊芝據黃梅英以卒七千助招討使曾元裕破之殺五萬餘人追斬僊芝傳首長安已黃巢逼斬春又密遣子通駢及蘄黃招討使劉巨容合兵躡之賊死十七事聞封英五原郡公太子少保元術左驍衛大將軍南樂郡公

南唐

蘄州

丁必稱字季言知臨江軍時江西和買例以稅產均敷無稅者以物力必稱積郡帑贏餘代輸之乃請於朝乞永與蠲免擢潼川提點刑獄

宋

黃岡縣

王揆字孔度泰和六年任虔化令築子城濬濠建廨舍創始功多後人賴之

江西贛州名宦志

蕪水縣

李禹卿字君益通判蘇州隄太湖八十里為渠以益漕運蓄水溉田千餘頃歲饑出粟三萬全活萬餘人復以棘寺丞出守潼川廉明多善政惠商通遠百物充物

江南蘇州四川邛州名宦志

廣濟縣

余玠字義夫家貧落魄好大言為白鹿洞諸生殺人亡命脫走江淮時趙葵為淮東制置使玠作長短歌上謁葵壯之留幕中嘉熙元年與元兵戰於汴城河陰有功累擢制置司副使淳祐元年入對稱旨授四川宣諭使尋授安撫制置使大更弊政遴選守宰築招賢館以禮士曰集思廣益諸葛孔明所以用蜀也蠻中冉氏兄璉弟璞有文武才前後閩帥辟召堅不起聞玠賢來謁玠闢別館待以上客兄弟終日不言惟對踞以堊畫地為山川城郭狀初不解一日屏人謂玠曰為今日西蜀計其在徙合州城乎玠躍起執手曰此玠志也遂從其計徙合州城諸砦於釣魚山屯兵聚糧為必守計十年卒

諸將巡邊直擣興元與元兵大戰十三年又大戰於嘉定皆
 敗之有戎帥欲舉統制姚世安為代玠惡軍中舉代之弊遣
 都統金某往代世安閉關不納又援丞相謝方叔密求玠短
 言於帝前玠鬱鬱不樂寶祐元年以資政殿學士召聞命愈
 不自安一夕暴卒蜀人莫不悲慕建祠祀之並祀鄉賢詳宋史
 梅應春號雪樵寶祐丙辰與弟應申同舉進士授餘干令遷瀘
 州安撫使當國事多艱之日勞瘁不辭政績不著累官禮部
 尚書應申為四川制置使區處庶務各得其要俱祀鄉賢
 姜賢咸熙閒以薦舉累官副使有清譽號樵隱先生
 游侶字同人寶慶丙戌進士歷官刑部侍郎簡重明敏治獄多
 平反端宗朝致仕元興累徵不起至元十五年卒年九十五

張紹祖字可成進士任甯國路總管操縱中度邊鄙肅然卒祀
 鄉賢

黃梅縣
 劉昕字公正進士以功名自許初任真州牧後遷蘇州守皆有

德教案縣志昕為宋崇甯閒進士王志列元誤

元
 黃岡縣
 冷庸字用和至正閒任西臺御史有風裁後祀鄉賢

蘄州
 朱仕俊字時英耿介好讀書至正閒以太學生授樞密院經歷
 出守蘄州興學勸農力除淫祀改潮州擒大盜金元佑調判

延平遷建甯同知致仕歸

黃梅縣

汪振卿至元閒進士官御史端廉直諒不阿權貴有古驄馬風郭友直至順閒進士任天臨路總管府經歷以德化民祀鄉賢明

黃岡縣

詹同字同文初名書婺源人幼穎異學士虞集見之曰才子也以其弟槃女妻之至正中舉茂才異等授郴州路學正避亂黃州因家焉太祖下武昌召為國子博士賜名同時功臣子弟教習內府諸博士治一經不盡通貫同學識淹博講易春秋最善應教為文才思泉湧一時莫與並遷考功郎中直起

居注會議禘禘禮同議當遂用之洪武元年與侍御史文原吉起居注魏觀等行循天下訪求賢才還進翰林直學士遷侍讀學士帝御下峻御史中丞劉基曰古者公卿有罪盤水加劍詣請室自裁所以勵廉恥存國體也同時侍側遂取戴記及賈誼疏以進復剴切言之帝嘗與侍臣言聲色之害甚於鳩毒創業之君為子孫所承式尤不可不謹同因舉成湯不邇聲色垂裕後昆以對其因事納忠如此四年進吏部尚書六年兼學士承旨與學士樂韶鳳定釋奠先師樂章又以渡江以來征討平定之蹟禮樂治道之詳雖有紀載尙未成書請編日厯帝從之命同與宋濂為總裁官七年五月書成自起兵臨濠至洪武六年共一百卷同等又言日厯藏天府

人不得見請如唐貞觀政要分類更輯聖政宣示天下帝從之乃分四十類凡五卷名曰皇明寶訓嗣後凡有政蹟史官日記錄之隨類增入焉是年賜敕致仕語極褒美未行帝復命與濂議大祀分獻禮久之起承旨卒同以文章結主知應制占對靡勿敏贍帝嘗言文章宜明白顯易通道術達時務無取浮薄同所為多稱旨而操行尤耿介故至老眷注不衰子徽字資善洪武十五年舉秀才官至太子少保兼吏部尚書有才智剛決不可犯勤於治事為帝所獎任後誣藍玉黨下獄及子尙寶丞紱俱死從孫希原為中書舍人善大書時宮殿城門題額往往皆希原筆也同徽希原俱祀鄉賢

明史列傳

吳琳字朝陽應澍子性純慤力於問學太祖徵荆楚名儒詹同

薦琳博學能文召為國子助教與同並教胄子同才藻過琳至商推經義疊疊不窮自遜不及也洪武元年除浙江按察司僉事復入為起居注四年典應天鄉試齋繡帛求書四方六年晉兵部尚書改吏部尚書量材授官號得人踰年乞歸帝嘗遣使察之使者潛至舍旁見一農人坐小杓旋起拔稻苗布田貌甚端謹使者前曰此閒有吳尙書在否農人斂手曰琳是也還白狀帝為嘉歎卒祀鄉賢弟琛自有傳

明史附陳修傳

廖永忠其先黃岡人元大德中徙居巢永忠豪邁有大志元末聚少年保巢湖旋迎明太祖太祖見其少謂曰若亦圖富貴乎對曰願事明主除寇亂垂名竹帛耳太祖悅以副水軍帥從渡江拔采石取太平蕪湖定建康討海寇所至有功與陳

友諒戰康郎山諒中流矢死太祖賜永忠田及殊牌鏤金字

八日功超羣將智邁雄師既而降陳理走張士誠降方國珍

執陳友定充征南將軍平兩廣太祖諭諸將曰永忠戰鄱陽

奮勇忘軀真奇男子其封德慶侯食祿千五百石又充征西

副將軍從湯和伐蜀蜀平太祖親製碑文美之永忠上印綬

太祖論平蜀功增祿千石洪武八年卒子權由散騎舍人襲

侯依縣茅志增入

黃榮機警有謀明初從太祖定江淮平中原有功授陽和衛指

揮後從傅友德平蜀論功賜金幣還鎮黃州修城浚濠招懷

降附民甚賴之卒祀鄉賢

徐便章富洪武時均從征伐有功便尤嗜學累官遼東都指揮

僉事富官指揮同知調金州衛宣布恩信頗著勞績俱詳盛

京通志

徐本性倜儻嫻文辭洪武初由薦舉任嘉興知縣重農事賑養

貧乏擢平陽知府荒殘後建置一新累官廣東布政使卒祀

鄉賢參廣輿記山西志案王志作雲南布政今依明史改定

黃奭洪武初官衢州知府營公署增城堡振文教興水利頑民

嘯聚奭親入其壘擒縱得宜開衢之功為最祀清節祠浙江衢州

名宦志

李本中洪武中由薦舉任通許知縣清謹公平驗丁編徭吏胥

縮手貧民無耕具者貸之使不失業許人咸頌其德河南名宦志

陳敬洪武時由歲貢授龍川知縣時盜起為害民不聊生都司

官將發兵勦之敬與邑人謀請為先圖密遣人誘擒其魁民

賴以安後擢刑部員外郎惠州名宦志

蕭昇字彥高永樂丙戌進士拜監察御史九載上疏省親文皇

命給道里費賜敕褒之中允王愷贈以文稱其禮以律身明

以折獄阜囊曉進臺閣生風白簡夕飛姦回落膽其見重朝

署如此卒祀鄉賢

胡恩字前江黃州衛指揮督運漕艘報最累遷瀘州參將移鎮

松潘諸土司長官例奉金幣恩一切擯斥威令大布三載進

秩總兵

張璘字文玉本姓周曾祖原昇遷黃蒙張姓璘永樂壬辰進士

歷官山東參政宣德開調福建性廉幹所至有治聲考最陞

應天府尹益剛正自守雖中貴不為屈卒祀鄉賢曾孫濟自

有傳詳明獻徵錄

方正永樂戊戌進士宣德閒任考城知縣寬刑薄賦守法奉公

得為政之體河南名宦志

王景字時亨先世以武功顯永樂閒襲榆林千戶英宗北狩景

與袁彬等七人擁護有功復辟時已卒特諭祭葬贈武略將

軍予世襲子璘字廷玉成化甲辰進士官廣西右參政與副

總兵毛倫平思恩士官岑濬亂璽書褒勞事見明史

劉以文字彥章洪熙中任温州府照磨以廉能稱擢知太和改

陽城有美政澤州名宦志稱其明於治體不矯飾為廉不姑

息為惠嘗璽書褒嘉增秩命再任後致仕歸民為樹碑歿時

耆老數十人赴弔於家並立祠以祀正統中有劉以德者由人材任知府亦有治聲俱祀鄉賢

王琳正統二年由監生任寧都知縣親賢愛士矜卹民瘼邑舊苦差徭農民不諳水石皆驅供別郡夫船之役琳入覲奏其狀及諸邑皆免之以憂去百姓送者皆泣下祀名宦祠寧都縣志

謝景宇伯明父希哲由人材薦舉官長垣知縣以幹濟顯景登正統戊辰進士授戶部主事景泰中都督黃竑得幸奏求霸州武清地景承命往勘還奏地實民產請罪竑天順三年由御史出知九江府以憂去民不忍舍起江西副使歷四川布政使所至以清慎稱晉副都御史巡撫貴州平麻陽趕子坪蠻有功後致政歸卒諭祭葬祀鄉賢參一統志楚紀明史

王思旻有幹才起家薦辟正統中為泰州判官泰故多牧地學

馬民閒思旻為奏罷三之二復苦水患請部使者蠲租六萬

餘石挽舟哀訴至以身投水使者大驚具奏獲允造廣運望

江二橋置預備倉八十閒秩滿當去民乞留遷本州同知德

政益林後歸老於家奉民祠祀之卒祀鄉賢子文奎詳孝友

孫麟自有傳明史附循吏吳履傳

鄒璽成化甲午舉人授榮昌知縣邑值兵荒極意蘇息作餽粥

以活饑民視獄中冤抑及輕罪者咸出之四川重慶名宦志

張佐字良弼成化辛丑進士有介行任彌勒州知州政平訟息

平十八岩運籌有功累官按察僉事免歸餽粥不繼晏如也

卒祀鄉賢雲南名宦志

王麟字體仁思旻孫宏治己未進士授封邱知縣勸農桑鋤強梗一境大治嘗途中見百餘人舉大木為耶許歌有蒼頭乘馬鞭之間之為太宰馬公治宅麟執蒼頭撻之復切責太宰子比入覲天下計吏庭謁尚書即向時所稱馬太宰也起席曰誰為封邱令賢哉愛其民因下揖時兩賢之卒祀鄉賢子廷槐詳孝友

陳廷瓚字汝忠宏治辛酉舉人授沈邱知縣擢彰德通判清謹有惠政遇歲祲賑濟有方全活者甚眾祀鄉賢子仕自有傳張濟字三峯宏治甲子舉人知嵩及清河二縣以氣節稱解組歸閉戶自怡同里王廷陳贈以詩云自遂歸田臥何曾入郭行比鄰稀識面州郡只知名其風概如此卒祀鄉賢

曹珪字廷獻正德辛未進士授桐廬知縣時屢年旱暵江西盜起邊軍南下經畫周緻事濟而民不擾召拜御史按廣西平猺獠有功再按陝西時武宗遣中官迎指揮韶鳳妻過陝珪遮留疏諫竟得寢歷官有餘俸不置私產悉與異母弟共之著有南坡奏議卒祀鄉賢曾孫士彥自有傳參浙江名宦志

賈啓字啓之正德辛未進士授涇縣知縣為政嚴明事至即決民有官清吏廢之謠累遷副都御史巡撫延綏啓博學多才慷慨談邊事甚覈所至有治聲及致仕家居儉約不殊布素鄉人稱為篤行君子卒祀鄉賢

余鑾字廷儀正德辛未進士授行人奉使封唐王王餉以金帛不受歸與諸生論學不輟有豪右觸法懷金求解鑾曰吾豈

以多金禍鄉曲耶斥遣之卒祀鄉賢

王廷儒號七澤濟子正德丙子舉人由都察院都事轉四川按察僉事左遷成都府漢州判官攝綿竹性公直一介不取撫卹窮民加意學校士民德之歸建家廟如制子弟有不謹者廟責之撫異母弟尤友愛孫追美詳文苑參四川名宦志

案王濟生五子廷儒前妻子也繼室徐生廷瞻方幼有羣盜夜至索金露刃將加於廷儒徐抱幼子請代賊義而釋之其後廷儒友愛諸弟至老不衰縣志

陳言字秉忠正德歲貢生仁慈謙慎鄉里稱為長者任慶陽府通判嘗督邊餉捐俸以助軍民立祠祀焉卒祀鄉賢

張澤字龍山本姓周父岐篤志慕古楊慎所銘萬松處士也澤

嘉靖乙酉舉人任蒙自知縣蒙當安南之衝時方用兵澤不避險阻招撫安輯累著勤勞撫按將議功遽乞養歸卒祀鄉賢孫啓孫博學篤行以歲貢官平度同知亦祀鄉賢曾孫之訓詳忠義

萬民望號樊江子嘉靖乙酉舉人有孝稱文學豐贍操履端潔教諭新野訓士誠懇惟恐不至於成又請修新野名宦鄉賢之祀應南畿同考聘校士稱最遷甯州知州士民攀轅遮道卒祀鄉賢新野名宦志

曹誥字廷寵嘉靖丙戌進士授瑞安知縣適山寇犯平陽境藩臬會勦駐邑中誥調度有方事集而民不擾值歲歉審貧困者刻期賑之治邑六年革姦胥懾豪右疏通水利具有政績

擢禮部主事累官甘肅巡撫卒於任浙江名宦志

陶珪字廷獻嘉靖丙戌進士累官山西按察使性端介不附權

勢所至稱廉平餘俸給諸孤姪事繼母以孝聞善擘窠大書

邑里重之卒祀鄉賢

汪文淵字亦崖嘉靖己丑進士選庶吉士改戶部郎中出為金

華知府時嚴嵩擅權其僕怙勢橫甚文淵捕逐之嵩每欲加

害媒孽無所得僅免官歸金華人祀之孫世植詳孝友

王鳳陽字桐岡定遠侯弼之裔也弼子誠孫貴遷黃岡為世族

鳳陽少穎敏力學嘉靖辛卯舉於鄉任萬縣知縣時土苗作

亂練鄉勇勦撫有功撫按交薦以疾乞歸講學者書老年不

倦卒祀鄉賢從孫欽濂自有傳王志注舊志有王弼傳考弼實定遠人不應立傳今附見

王鳳陽傳內

方任字志伊嘉靖壬辰進士歷刑科給事中以愨直忤權貴改

兵部主事出為四川僉事江西參議副使所在有廉幹稱晉

江西右布政以母病告歸苦次拜副都御史巡撫應天不起

父勇性方嚴任每先意承志義方孝行鄉評推重俱祀鄉賢

董德明嘉靖壬辰進士歷官處州知府周卹民隱府縣常例釐

革悉盡才識明達四境安其治五載擢山東兵備副使仕終

河南右參政浙江名宦志

劉珙字商陳嘉靖庚子舉人除黃縣知縣摧鋤豪右無所避海

賊臨城肆掠拒卻之遷知甯羌州民被仇家夜殺七人索屍

不得珙焚香告天雷發其屍而冤雪歷仕不置生產居鄉以

公亮稱子功允自有傳

周之冕字元服嘉靖庚子舉人授餘杭知縣勸農桑勤教化凡訟牘悉置祕室吏胥無所售其姦催科酌緩急尤崇獎孝義

節烈後陞知州

浙江杭州名宦志

邱岳字南正尚忠子嘉靖丁未進士擢工科給事中時伊藩典橫貪悞僭侈岳上其罪狀得勘定直聲隆諫垣累官禮部右侍郎典冊多出其手遇事敏達勵操清素每誠其家不得與公事致仕歸兩奉恩詔存問卒祀鄉賢

程鳳金嘉靖己酉舉人任彭澤知縣多善政方正不阿直指按部上謁獨後直指諷之鳳金出曰御史所以有權者能去人之官也吾官自去御史何權為詩懸縣門云一生惟拙天知

我三載無能我愧官今日銓衡方論定好歸舊隱理漁竿遂挂冠歸直指旋悔遣追之竟不返邑人立祠祀之有禱輒應

九江名宦志

陳仕字又愚廷瓚子嘉靖壬子舉人授弋陽知縣築城捍賊遷嘉興通判從胡宗憲破倭有功晉同知以母老乞歸家貧授徒自給友愛兩弟其子九疇應貢在弟前令稱疾不出弟遂得先貢

廣信名宦志

杜傑字汝英鳴陽子嘉靖戊午舉人任長甯知縣歲歉賑飢全活甚眾時九絲初定黠酋內訌拮据調劑卓有政績後采木山中值水涸露禱雨注木乃出先是西南夷騷動議征討傑力陳不可當事弗聽卒致敗人服其識卒祀鄉賢子應芳自

有傳四川名宦志

王廷瞻字穉表濟子嘉靖己未進士授淮安推官入為御史督畿輔屯政穆宗在裕邸欲易莊田廷瞻不可隆慶元年所部久雨請自三宮以下裕府莊田改入乾清宮者悉蠲其租詔減十之五己言勳戚莊田太濫請於初給時裁量田數限其世次爵絕歸官制可高拱再輔政廷瞻常論拱遂引疾歸神宗立起故官歷太僕卿萬曆五年以右僉都御史巡撫四川番屢犯松潘廷瞻令副使楊一桂總兵官劉顯勦之殲其魁羣蠻納款風村白草諸番久居二十八砦率男婦八千餘人來降復命總兵顯討建昌傀儡洗馬姑宰鐵口諸叛番皆獻首惡出降增俸一級進右副都御史撫南贛入為南京大理

卿歷兩京戶部左右侍郎以右都御史出督漕運兼巡撫鳳陽諸府寶應汜光湖隄蓄水濟運平江伯陳瑄所築也下流無所洩決為八淺匯成巨潭諸鹽場皆沒淮流復奔入勢益洶湧前巡撫李世達等議開越河避其險廷瞻承之鑿渠千七百七十六丈為石閘三減水閘二石隄三千三十六丈子隄五千三百九十丈費公帑二十餘萬八月竣事詔旨褒嘉賜河名宏濟進廷瞻戶部尚書巡撫如故尋改南京刑部尚書未上乞歸久之卒贈太子少保賜祭葬祀鄉賢子同鼎詳篤行同觀詳孝友明史列傳

李植字良材嘉靖辛酉舉人除萬縣知縣治獄明決時為之語曰勿歧舌見必屈杜若昏冤必伸有無賴子殺一家七人而

匿大索久不獲植禱於神得其貌寤而跡之卒伏辜考最徵拜御史請省壽陵費上嘉納之後以伉直出為福建僉事爬搔宿垢風采一新尋乞假治喪卒於家王世貞誌其墓祀鄉賢

參四川名宦志

王同道字純甫廷槐子嘉靖壬戌進士授蘇州推官擢御史謫內江知縣調停里甲訓迪人才江民頌之詩古文詞咸有逸

氣四川資州名宦志

袁文伯字綱齋博學篤行嘉靖甲子舉人授潛山知縣政簡民和土風大振會江院白某過潛無所取給白不懌呼語之曰子讀中庸柔遠人乎曰知縣只解子庶民而已即日挂冠歸養親不懈者二十餘年時稱孺慕先生著有詩集十卷子希

變詳隱逸

陳萬卷字德備嘉靖中以吏員授安平縣丞值白蓮賊起萬卷白令督鄉兵急搗其穴賊方會飲舉事聞萬卷至整眾出禦萬卷三戰皆捷擒其魁賊忽仰首咄咄作幻術甲騎起空中萬卷瞋目大呼風雨驟至人馬皆墮地蓋剪紙為之也於是眾悉就縛撫按上其功賜金帛擢永平通判安平人立廟祀之

參通志

范芝字德和性至孝有雋才好學洽聞兄及姊子貧不能自立推產贍給之嘉靖閒以選貢除定遠知縣甄善除惡招撫流亡邑大治以母老乞養百姓遮留不得去微服遁歸卒祀鄉賢

定遠名宦志

劉功允字順廷琪子隆慶丁卯舉人授懷遠知縣轉温州同知

剖決簿書人稱神明贖鍰不入私橐悉以賑貧士修學宮整

飭海防民賴以安調汝甯宦况清苦如舊子宗祥自有傳宗

祺副榜博學饒才略舉賢良授知府不就浙江名宦志

汪守廉字克辨祖大章有隱德歲饑出穀千石貸鄰里不責償

守廉隆慶丁卯舉人任茂州知州視民疾苦如痾瘵切身士

民愛慕苗獠傾服陞曲靖同知以清白聞璽書賜金褒之子

傑選貢臨洮通判卒祀名宦孫國潔詳隱逸四川茂州名宦志

易倣之字惟倣隆慶戊辰進士授行人歷戶部郎任衢州知府

衢五邑舊苦餉解倣之為酌道里食正戶米少者止幫路費

民免困累轉四川涪州道以招諭楊應龍晉參政卒祀鄉賢

浙江名宦志

涂巍隆慶庚午舉人任廉州同知陞知府敦大不苟片言決訟

歷十餘載未嘗誤杖一人攝篆四府所至有仁聲廣東名宦志

汪一右隆慶庚午舉人累官泗州知州時總河潘季馴請加泗

城護隄命一右董其役隄長二千餘丈高於舊二丈又建子

隄千六百八十丈一右勤苦倍至凡二年竣工泗水患息泗

人祀諸名宦祠法見明世錄

葉正蒙字養源隆慶庚午舉人授封邱知縣創書院崇學校尤

以廉潔著聲擢直隸州知州因父病乞養歸里父卒廬墓三

載後祀鄉賢封邱名宦志

杜伸字冲宇鳴陽子隆慶辛未進士仕至松潘兵備道捍守邊

睡以勤事卒巡撫喬維新為治喪事發篋僅敝衣數襲聞於朝贈太僕少卿賜祭葬子凌雲以孝稱孫琦詳篤行

江沛然字應吾隆慶辛未進士以給事中謫廬州府經歷署廬江事積弊之後力為振刷廉巨姦寘之法一境肅清海忠介

公瑞亟稱之後遷南戶部郎中罷歸江南名宦志

曹士彥字孟彥生有至性事繼母以孝聞萬曆己卯舉於鄉任

定遠知縣清正自矢勵學勸農振滯按姦民有不若訓者婉諭之及卒邑人張御史一鯤斂金治其喪號哭送者數千人

立祠以祀有禱輒應子之建詳篤行定遠名宦志

郭知易字如紀慶孫萬曆己卯舉人授中江知縣有廉幹聲擢工部主事時方建兩宮御史議簽人夫運石知易上議造車

法所費視舊僅十六之一官儲無損而民不擾遷員外郎告歸囊無餘物耿定向稱其世濟清白云

洪聲遠字四極萬曆辛卯舉人授高平知縣歲大旱飛蝗蔽日聲遠禱天暴日中俄雨降蝗盡死遠近異之陞戶部主事出

知貴陽府時土司安邦彥作亂圍城聲遠禦之大小數十戰外援不至激勵士卒誓以身殉人皆感奮無叛志圍遂解以

功擢新鎮道監軍副使接物寬和民皆愛戴晉雲南參政以老乞歸子有守舉人博學能詩古文尤工書畫貴州名宦志

何天申字德錫萬曆辛卯舉人授廬州通判三載召判順天時乾清宮災歷代珍寶燬盡上按籍召商買補天申抗論明王

不貴異物今珠寶價一千一百四十萬有奇取之太倉則不

足加派則厲民惟宜加意修省以回天變疏入落三級補無為州判築鱖魚壩二十里民賴其利移判鳳陽致仕歸

樊玉衡字元之煒子事親以孝聞性澹泊無所苟萬歷乙未進士授商城知縣商故徵賦保伍與胥役為姦又縣拘囚者例用馬快所至家輒破玉衡悉罷之遂按誅豪蠹教以孝弟廉讓期年訟獄衰息會中使採礦至商玉衡宣言無礦與之抗因導入險為文告山靈曰有礦當吐符陳貢不然而令與璫藉口括金以為民禍神其殛之璫怏怏去調知崑山縣民以織造中璫苛稅課其門璫怒郡縣約往謝玉衡曰彼自擾民賴郡邑戢之彼不我謝反謝之耶卒不往在崑五載不私一鍰報最方推吏部主事聞父病遽乞歸養去之日做篋一肩

而已旋以待疾勞瘁卒商崑兩邑祠祀之崇禎初敕建專祠諡孝介祀鄉賢著有智品十卷

孫大壯字心易生有雋才萬歷乙未進士累官福州知府治行清簡時稱循吏擢江西右參政終陝西苑馬卿所著詩文袁宏道推重之

周蓋臣萬歷丁酉舉人任石泉知縣清操有惠政民懷思之四川名宦志

穆天顏字象懸萬歷戊戌進士授番禺知縣舉最拜福建道御史疏劾稅監及諸權貴凡所建白婉曲引喻時疏多留中而天顏奏輒下部議行歷巡按廣西大著風節以艱歸天顏性至孝方少時父守文教諭四川卒於官與兄扶櫬走萬嶺中

貴盡逆旅不納會雷雨昏黑哀號逐電光行聞者皆為感泣
卒祀鄉賢

官應震字賜谷如皋子萬厯戊戌進士初為南陽知縣再補濰
縣舉循良第一召為戶科給事中於人才消長東宮國本禮
儀奢儉宦豎朋黨無不陳說在諫垣九年前後二百餘疏皆
救時碩畫神宗嘗以敢言稱之光宗即位遷太常少卿尋乞
歸天啓閒屢召以魏璫用事不起卒祀鄉賢著有疏稿二十
餘卷宛維政紀十卷子撫辰詳隱逸撫邦撫極自有傳撫渙

詳忠義

案王志入漸水
今依通志移入

於倫字大常萬厯辛丑進士官通政使以不附魏璫告養歸璫
敗起原官不赴卒祀鄉賢子斯行詳忠義

曹光德字大洪萬厯辛丑進士授嘉興推官政稱清簡泣任三
年以憂去所攜惟圖書而已時江西鄧元錫力排心學嘗著
五經釋光德為參訂焉後官監察御史卒祀鄉賢

鄭之良字直夫萬厯癸卯舉人累官敘州同知時烏蒙安邦彥
為亂川西南半陷督撫朱燮元檄之良監軍賊一日稱觴為
壽之良提兵入其壘擒賊將四十餘人殺傷無算獻俘京師
遷鎮遠知府征苗復有功晉按察副使歸卒

杜應芳字懷鶴傑子有異才萬厯丁未進士授禮部主事出為
河閒知府時福藩之國屬邑供億需五萬金應芳上議得省
三萬後三王之國視為例天津稅璫馬堂橫肆應芳得其弟
不法事捕訊之堂坐此逐去旋督學四川無敢以片牘干者

後遷福建按察使歸卒妻樊氏死難詳列女傳

參四川名宦志

程之試字考錫萬曆己酉舉人累官開封府同知治河著勞績

河有妖羣像祀之之試縛其像投諸河妖遂絕

鄒之易字心元少貧負薪水以供母登萬曆庚戌進士授銅梁

知縣徵解錢糧不取羨餘嘗解餉至府有吏兌銀稍不平叱

之曰窮縣脂膏供若高下其手耶去任有存積三千金謀諸

邑紳置義倉廣儲積安奢之叛城賴以全後官兵部主事

甄淑字爾儀號錦石萬曆庚戌進士授陽武知縣調太康皆有

異政入為吏科給事中疏請額丁額米兩衡其數丁隨米收

額不減而貧民罔病熹宗從之他奏疏多救時碩畫會楊漣

被逮淑疏救激切及阮大鍼嗾傅櫬劾魏大中左光斗諸人

淑復疏辯其冤忤魏璫削籍歸崇禎初起官歷南北刑部尚

書

詳明史

王欽濂字孟周博學多文萬曆壬子舉人知江西南陵縣首開

六連湖澤及數千戶時寇躡江南捐俸賑饑練鄉勇增城堞

賊不敢窺撫按以守禦功疏薦第一尋卒於官祀鄉賢長子

承祐副榜有詩名孫懋德懋才同榜進士懋德自有傳

李五美字尊菴萬曆壬子舉人累擢欽州知府時山寇劫掠民

多逋賦五美設營分戍解散之賦因以登上官胥徒過境騷

擾痛懲不稍貸修城濠葺學宮蒐志乘文物煥然狼賊趙承

烈據河州五美畫策堵禦兩省賴之會惠州有海警題授惠

州海防道勞績尤多

廣東名宦志

王六如字凡夫萬曆戊午舉人授信豐知縣時寇盜蜂起軍供無數富戶謹愿無不破產者六如請照糧編派黠者不得規避往倉庫典守外簽里民六如釐正之責歸庫吏邑人立祠以祀內遷主事卒

江西名宦志

祝世美字濟之萬曆己未進士授諸城知縣有異政調東阿以最擢吏科給事中遷兵科都給事會張應昌殺良冒功世美上疏劾之後以守城功陟太常寺卿乞養歸卒

晏清字泰徵萬曆己未進士授蕪湖知縣廉介明允調吳江百姓請留吳吏來迎爭於路不得行再宿然後去值水澇為民請命得邀全荒例改折擢吏部稽勳郎時魏璫用事請封其從子良臣為伯清阻之不得行尚書周應秋怒遂削職崇禎

初起官歷廣東鹽法道卒於鬱林子霽明有文學時與其五孫俱亡子婦樊氏護櫬悉歸葬

參太平府名宦志

官撫極字建之應震次子泰昌拔貢生任貴陽通判駐畢烏有捍衛功畢烏人肖像祀之陞平越知府忽苗帥監二率萬眾圍城七晝夜撫極力禦之伺其懈以壯士七十人夜襲賊營擒監二餘散去以功陞太僕寺卿致仕歸

廖自強字中立天啓歲貢生授江油知縣縣有荒糧萬餘自強泣言於大吏疏請得盡蠲免邑人尸祝不衰

曹之棟字喜玉天啓歲貢生學問博洽與易道暹相友善後任公安訓導具人倫鑒公安人士悅服卒後祀諸名宦祠子大漢嗜古工書法詳隱逸

程良球天啓辛酉舉人知渾源州申革草商除民大害以憂去

任士民懷之大同府名宦志

何閔中字蘧宿號綱卿性敏捷讀書目十行下天啓壬戌進士

歷任四川提學副使素饒才學復善鑒別所拔皆名雋遷瀾

滄兵備道捍患禦災功績甚著生平德量寬厚時稱蘧宿先

生子昌祚詳孝友四川雲南名宦志

靖科元字若谷天啓壬戌進士授邯鄲知縣興利鋤姦民懷其

惠歷工部郎中以簽京商事與周延儒忤罷歸時流賊蹂躪

築砦小崎山保聚鄉族遭土寇襲破之以身殉焉子乃心廩

生乃式貢生俱從死案縣志選舉表科元官至浙江副使

劉宗祥字梧陽功允子天啓乙丑進士授金壇知縣時海盜王

武烈為亂捕寘諸法餘黨憤起人皆危懼宗祥悉討平之舉

最擢御史崇禎初巡按江西條陳興利除害數事稱旨繼按

四川陞覲面劾侍郎張捷行私捷坐免官時候良柱秦良玉

討平奢賊賞格不行宗祥上其狀始錄前功後巡撫江西致

仕歸

王源昌字紹貽陞孫天啓乙丑進士授禮部主事出知平陽府

抗監軍中使以清直聞崇禎十三年分巡大梁時宗室驕恣

源昌執法裁制不假借移鎮河南禹州歲旱人相食源昌設

法賑濟全活甚眾流寇陷洛陽將窺禹源昌飭練鄉兵防禦

周密郡賴以全遷汴梁觀察使乞終養歸年九十卒河南名宦志

魏公韓字小韓少事祖母以孝聞天啓乙丑進士授太平知

縣修復伯翳祠墓城垣壞募諸紳士力築之已寇至督鄉兵
斬獲無算民立生祠祀焉歷汝南大名薊永道興士愛民所
至皆祀名宦魏忠賢張彝憲聞其名欲致之公韓不稍屈崇
禎初巡撫保定以母老乞歸隱居樟松湖築室曰漁臺甲申
後杜門不出年八十一卒

陶紹侃字惜之尚義有勇略天啓丁卯武舉授鄖陽遊擊會漢
中亂陝撫檄為前部至三條嶺大雪敵未備突騎乘之斬獲
無算事聞擢前軍都督僉事值房竹寇亂力戰紅坪灣渡泥
關諸隘遷臨鞏總兵左軍都督告歸卒於家

王用予字安生崇禎戊辰進士授淮安推官屢白冤獄修文起
書院每月親臨課士歲荒賑饑活流民以萬計淮有新舊兩

城頻苦水患捐貲為築三壩兩城獲全會有詔選儒臣有治
行者入翰林遂授檢討子澤宏詳文苑江西南名

易士龍字雲閒崇禎庚午舉人授醴陵教諭葺考亭書院崇尙
正學遷大昌知縣流寇兩次來攻皆力禦得免寇退門者俘
三十餘人以閒謀論且云前此皆以是得紀錄士龍訊知其
陷賊狀盡釋之改宿松縣歸年八十四卒子為泰詳孝友

牛若麟字鶴沙崇禎丁丑進士授吳縣知縣饑民蜂起將為亂
若麟亟賑卹治其魁變遂定後陞監察御史江蘇蘇州名宦志

蕪水縣

薛徵天定孫元末為兩淮水陸都統制明太祖遣左司郎中吳
明遠齎手詔召之遂渡江從太祖參幕府畫策屢中命督金

華軍事軍政修飭子均自有傳通志

楊思義魁梧奇偉有幹才太祖稱吳王以薦舉授起居注累官

戶部尚書大亂之後人多廢業思義請令民間皆植桑麻四

年始徵其稅不種者罰如周官里布法詔可又請令天下立

預備倉以防旱凡所經畫皆詳密時稱其能調陝西行省

參政卒於官

王志明史本傳不詳其籍里今據通志舊志邑志選舉內皆註斬水人年代官爵悉與史合湖尚有其墓

薛均徵子生時徵夢人投萬鈞懷中因名萬鈞後更均治五經

補博士弟子洪武中以懷才薦舉上十策高帝異之會其母

疾固請放歸旋除知合州治行為天下第一文皇時擢應天

府尹崇尚清約買舍旁片地種菜嘗自芸之帝廉得其狀笑

曰人皆樂惟朕與均獨苦也年七十乞歸特進禮部侍郎或

疑其歸裝宜重中途伺發之惟紙馬板一具文皇知其貧命

有司賜官湖頃餘後人因名欽賜湖又曰薛家湖子孫世守

之兼鬻紙馬至今巴河有薛紙馬之號

案均為邑之巴河人至今父老猶能述其清苦所居地曰

神馬嶺即所謂紙馬之號也萬歷閒知縣閻士選題其廬

曰清白世家縣志

魯毅定番衛指揮洪武中月魯帖木兒反攻圍城池時衛初設

百度未舉毅運謀撫眾晝夜拒守伺賊怠擊破之陞遼東都

指揮使

四川甯遠各宦志黃紹祖洪武中貢入國子監陟刑部侍郎楚紀謂其老成有才

戴綸字經邦英邁方正篤於孝友洪武庚午舉於鄉任監察御史出按山東風裁凜凜以糾劾忤時貴謫梧州通判再謫庫官尋改監倉糧歷官以清忠自持時貴欲致之死以無隙而

止見分省人物考

吳永喆字克明正統辛酉舉人事母以孝聞博通羣籍授南川教諭調恤寒士訓迪有方學士江朝宗布政使蔣雲漢御史蔣泰俱出其門尋拜河南道御史蜀人至今稱之

范煥字五雲監生任建陽知縣設義學訓蒙士省賦清刑百姓德之尋行取赴京士民泣送載道建陽名宦志

張存禮字秉周成化間以天文辟舉授德慶州知州州有沈獄存禮下車立為剖雪歲旱累年禱雨立應又教民修輓轡製

水車農民利之他善政不可枚舉致仕歸正言飭行鄉里式焉卒祀鄉賢

魯永清字本端成化辛丑進士為大理評事執法不阿出知成都府清介有聲遇旱糴粟賑之府舊無倉乃置倉儲粟明年又饑民用不困安縣賊烏合萬餘永清往諭之皆散去又設八釜於門外令訟者就爨立與判決而歸民間有魯不解擔之謠歷官江西左參政卒祀鄉賢

徐紹先字繼之成化丁未進士正德中知銅仁府時鎮守苗作亂紹先繕城堡備芻粟治器械練民兵苗聞而憚之不敢犯

境貴州名宦志

徐吉貞字天相宏治戊午舉人授忠州知州催科不擾條陳十

事深切時艱時麻鶴兒文千戶暴橫里中百姓惶懼吉貞計除之遷南戶部郎中乞歸絃誦自適孫步雲舉人為祿豐知縣有善政

參四川名宦志

田重器字國用本姓錢宏治甲子舉人正德中知江津縣興廢舉缺多善政縣有巨惡計擒之民賴以安子貢字少江與父同榜舉人任絳州知州絳多宗室貢執法不頗宗人主事來州放糧有混領銀一封者主事語貢夜令人款其門曰州中

有事相喚其人即持銀出曰將送來矣其見憚如此孫邦偁自有傳

李宗元字東皋汝子正德庚午舉人除沈邱知縣邑初建百事草創宗元廉以律己嚴以御下政無不舉臺檄有不便民者

輒封還之治行居河南第一卒祀名宦並祀鄉賢

李延芳字叔慶正德歲貢生為大足訓導操履醇正言笑不苟校士寒暑不少輟諸生貧者捐俸助膏火歲禋道殣相望力為揜之陞汝川教諭致仕疾劇值父忌辰索衣冠強起力不支伏枕痛哭而卒祀四川名宦並祀鄉賢

王志入孝義今依縣志移入

程轍字子建正德丙子舉人沈毅有大節雅志不仕父強命之授塾江教諭俗頗陋轍從容勸誨每社飲以談說經籍為娛蜀人化之後官國子監助教著有說易錄卒祀鄉賢

周瑯字光載正德辛巳進士歷都諫以論列抗直出為廬州知府廉惠一時稱最按輯包孝肅公奏議序而梓之遷廣東督學以行誼經術教士規範嚴肅請託一無所徇卒於官著有

顯侗集春秋補傳祀鄉賢孫應期自有傳

胡仲謨字啓忠正德辛巳進士沈毅樸訥臨事不苟授遂安知

縣豪猾斂跡民皆樂業後官雲南按察使尤折姦洗貪凜凜

難犯告歸年八十六卒祀鄉賢

浙江嚴州名宦志

朱珍字汝衷嘉靖癸丑進士擢南御史出知常州府爬姦剔蠹

舊俗一新晉陝西副使值西羌跳梁乃城金川選精騎千餘

自持短兵督其後賊盡駭散尋參政雲南有銀場官吏乾沒

則嫁禍齊民珍廉得其實寘乾沒者於法後官浙江按察使

擢雲南右布政以老去送者萬計至毘陵猶弗止卒祀鄉賢

子期至期昌俱詳文苑

錢邦偁重器孫嘉靖癸丑進士授臨安知府慈恕得民除一切

陋規尋常詞訟爲之勸息歲儉設粥救饑捐俸完民逋稅陞

苑馬卿去後民歌誦之

雲南名宦志

周鳴埴字思友嘉靖己未進士授餘姚知縣邑以倭亂後徭役

最苦鳴埴下令丈田按籍雇募公私便之有官湖爲豪貴竊

據核令還官歲漑田數千頃分校鄉闈主者索所私卷堅執

不與歷廣東參議挂冠歸三十年絕足不入城市卒祀鄉賢

李畿嗣字民欽嘉靖壬戌進士除廣信推官庇平民忤權相旋

擢營繕司主事督乾清宮工世宗親賜食卒爲嚴嵩中傷左

遷漳州同知數平海寇漳人德之擢知惠州府先是沙田陸

梁人民逃散畿嗣縱反閒擒賊首流移盡復時嶺南有事羅

旁羅與肇慶相接延袤數千里剽掠不可制當事調畿嗣爲

肇慶知府畿嗣設方略大破之盡平羅旁東西山升瀧水為直隸羅定州置東安西甯二縣隸焉捷聞遷監軍副使卒祀

鄉賢子生采詳孝友

參福建志

易之貞字忠甫隆慶庚午舉人署青浦教諭以廉勤擢戶部郎

中督餉易州奏免積逋二十萬行部至良鄉憫逋糧故官為

請減十之九且捐俸代償之奏罷礦瑞王虎卒為忌者所中

出守馬湖三月歸

案縣志之貞本舉人通志作進士誤

王希元字白岳隆慶辛未進士初任南太常博士序禮典樂多

所建明時有富商妾生遺腹子嫡子利其貲逐之訟久不決

訴之希元嫡子求勝賄千金希元論以義均其財并取所賄

金給妾子南人頌之擢吏科給事中以議兩宮朝禮忤權貴

謫滇南旋提學福建轉江西參政會御審作器淫巧糜費浚民抗疏罷之尋乞歸卒祀鄉賢孫教民詳孝友

徐一唯字心溪隆慶辛未進士授萬載知縣沈毅果決置學田

以贍師生定瀏陽豪戶爭廣洞田地之亂擣大圍山巨寇李

大鑾等民賴以安累官兩淮鹽運使孫三餘三仕詳篤行

江西

袁州名宦志

何鳳起字近邾萬曆甲戌進士授葉縣知縣善聽訟不曲事上

官張居正子懋修北上所過餽遺甚厚鳳起獨贈以疏布居

正聞而驚曰此必清操令也鳳起適罷職居正言於朝即日

遷知廣德州歷官雲南按察副使

蔡斗移萬曆丁丑進士由刑部郎出為臨江知府以正率屬以

惠字民陞長蘆鹽運使冰檠自矢課賦無私商民頌之卒祀鄉賢

徐存德字恆菴萬曆丙戌進士任仁和知縣時摺紳持政俗刁健存德絕遠權勢毅然與之更始座師某使人致書存德邑郎囑其使為之干請存德拒其請而厚贖遣去使猶懇求不已遂笞而逐之歲歉且疫存德捐俸賑饑民呼為活命官奏最擢南戶部主事旋致仕歸

閔廷甲字翼墟萬曆己丑進士授常州府推官以敏練稱嘗自言始至誤斷一獄至今悔不能已擢吏部郎中時神宗欲立福王為嗣廷甲同孟養浩等伏闕上疏力諫坐鑄級後陟通政使布衣疏食以清白聞卒祀鄉賢子以棟歲貢生鞏昌府

同知有才名

江南名宦志

張文光字公瑾萬曆戊戌進士授檢討以論楚藩華燿事忤沈一貫謫光山縣丞久之遷尚寶丞每慷慨陳言述古今法戒修身講學之要累官國子監司業

案文光本邑人其鄉會科具載郡邑舊志後遷江夏故通志作江夏人

金玉節字雅初萬曆戊戌進士授長興知縣勇於有為值礦使為民害玉節繩以法卒不敢肆歲當編審立走區走田法通融均攤詭寄無所容民稱便焉遷刑部員外郎卒祀鄉賢子甌詳文苑

浙江湖州名宦志

周延光字斗垣萬曆辛丑進士授金華知府政靜民和晉副使

提督浙學春秋兩闈元魁皆所拔士遷左布政收筦關支躬自閱視主藏吏抱牘記出納而已宿弊一清卒祀鄉賢

浙江金華名宦志

周應期字際明萬曆辛丑進士授行人司奉命冊封豫章益王

擢御史接嶺南執法如山有神明之頌先是應期祖瑯督學

嶺南得士最盛及應期至粵人慕如考妣同祀名宦並祀鄉

賢

游之英萬曆丙午舉人授麗水知縣值歲歉開預備倉以賑且

施粥食之學宮圯捐金為倡他祠廟堰埠并加修葺時有虎

患之英禱於神械至之人謂精誠所感云

浙江處州名宦志

謝天申字元菴萬曆戊午舉人授西甯知縣持躬嚴潔尚禮教

捐俸創建典學書院進邑人士面課之咸奮於學

廣東名宦志

蔡國琦字廷玉性孝友萬曆中由太學生任壽光主簿署縣事

歲歉賑饑作勸賑歌示民存活甚眾卒祀鄉賢

畢九臣字恆甯天啓甲子舉人第十臣字恆泰崇禎丁丑進士

九臣初為儀瀧知縣時儀被流寇焚掠城圯九臣招集流亡

捐貲修復募勇教戰寇不敢窺歷四載遷紹興府同知十臣

任慈谿知縣適歲饑姦人揭竿糾眾圍積粟之家謹愿者皆

惶恐十臣聞之即率執杖役二門豎一輕騎至圍所叱曰若

等將作亂耶抑饑求貸穀耶如作亂即縛我去如求貸何不

先告我眾皆俯伏杖其倡首者二人事乃定旋行取御史都

城陷遂歸杜門著述以終

桂啓芳字叔開崇禎辛未進士授海陽知縣時海寇劉香老猖獗啓芳以計擒其黨林龍角周瑞偉杖斃之出奇助督府卒平劉香老忌者奪其功落職歸益讀平生所未竟書披衣挑燈達曙不倦子陵詳文苑

黃耳鼎字澹巖幼好學崇禎丙子應順天鄉試道逢老人哀泣問之以被冤致鬻女耳鼎紆途三日傾囊贖女歸之後試期弗顧也會棘闈火試改期遂登賢書明年成進士授中書擢廣西道監察御史彈劾不避權貴巡按陝西值闖賊破都城奔赴江南尋卒

周壽明字天格光德孫崇禎丁丑進士授臨海知縣鑿東湖注大河環衛郡城寇不能犯衛軍苛糧擾民壽明治以法立靖復攝海甯天台篆以計典廉能第一調曲周三月召對稱旨擬擢吏垣都城陷遂歸入山

國初徵起壽明懋陳親老詞甚哀得免伏處終身足跡不入城市著有敦和堂集孫節周自有傳

高宏基字元開如岳子崇禎庚辰進士授大名府推官歲饑捐俸給貧民牛種山東梟賊米玉竄境宏基諭以禍福尋就撫時流離初復俵馬苦費重宏基白直指疏請改折郡人德之麻城縣

吳山字仲安洪武初舉明經任合州學正教化大行擢內江知縣稱廉吏生平博學多聞尤精春秋鄒來學輩出其門卒祀鄉賢

李甯字景安洪武初為餘干知縣才識英敏值羣盜竊發甯率鄉兵會官軍擒渠魁散其黨數百人歲饑移粟賑民民咸懷之勒石以紀

楊敬洪武初為富陽知縣勅置廳宇建立學校寬猛得宜民懷其惠 楚紀

劉從政字恭明洪武甲戌進士拜監察御史嘗諤忤直彈劾無所避保靖宣慰司族屬相仇殺從政齋救撫諭之歷河南山西參議皆清慎卓著循聲卒祀鄉賢 分省人物

鍾亮 縣志作鍾亭 洪武中知定陶縣有惠政秩滿當遷民請留之遂復任 山東曹州名宦志

毛添佐字公輔永樂閒由知州署肇慶知府守正奉公庶務修

舉尤敬禮賢士去後民思慕焉 廣東名宦志

董應軫字宗南宣德壬子舉鄉試第一累官福建提學僉事天

順七年廣西大藤峽賊亂舉朝以經濟推應軫陞參議往討

平之卒祀鄉賢子紱自有傳

鄒來學字時敏宣德癸丑進士授戶部主事督餉陝西規畫有

條理陞員外郎從王驥征麓川有功晉通政司參議正統十

四年也先犯京師擢僉都御史提督軍務巡視畿甸東北諸

關隘時人情洶懼廷議遣惟謀守城來學請分遣文武大臣帥

兵據險邀敵歸路廷議聽之於是命來學帥所部趨紫荆關

道易州追躡虜後方百務叢勝之際來學綜覈名實刻期樹

功凡築城浚池轉餉練兵事為之所京師賴捍蔽焉景泰閒

陞副都御史巡撫南畿勸農桑修水利姦吏勢豪悉繩以法

又請留京儲以備賑濟復軍運以省勞費時善其議以勞邁

疾卒諭祭葬崇祀鄉賢孫騏成化己丑進士歷刑科給事中

補參議以耿介稱參楚紀及分省人物攷

鄧達一作鄧達宣德乙卯舉人授江津知縣狷介不苟政暇課諸生

文藝訓誨諄諄擢御史官貴州僉事卒祀鄉賢孫楚望詳文

苑四川重慶名宦志

劉訓字忠言其先世有名夢者從高帝起兵官同知賜田麻城

因家焉訓正統己未進士初知金壇縣有惠政性儉素治蔬

圃以自給邑人王豪錢澍貧而好學訓以俸資給之後俱成

進士吏部尚書王翱特疏薦治行為天下第一累擢山西參

政卒祀鄉賢孫璫自有傳分省人物攷

李正芳字彥碩夙有隱德正統壬戌進士歷官東昌南陽知府

改授保甯時趙鐸反正芳率兵討之設奇制勝功甚著累任

山西布政使去後民甚思之卒祀鄉賢子灝字士清成化己

丑進士官參政以廉平稱孫文祥自有傳四川保甯名宦志

案正芳家居時與督學僉事董應軫按察使周鑑俱以碩

德重望為時所師法知縣朱嵩為建者英堂於縣治之右

凡有大政輒請諮議麻城舊志

周鑑字以人正統乙丑進士授監察御史出按江西大學士陳

循子所為不法鑑置大辟陳切齒伺無所得乃諷部遷雲南

副使九年不調鑑汰貪墨理誣枉開寶泉壩溉田數萬頃陞

山東按察使乞歸卒祀鄉賢孫廷徵自有傳

周庠貢生正統中為陳州知州緩刑罰興學校復業之民計口

授田教以種植居數年州漸富庶百姓戴如父母卒祀鄉賢

河南名宦志

熊祥景泰庚午舉人授浦江知縣築城修學建演武場政績不

著子縝知成都縣亦有賢聲後知邛州四川名宦志

喻文偉以明經舉歷官懷遠知縣有廉介稱卒祀鄉賢

曾啓景泰癸酉舉人授犍為教諭詢人不倦為文尚理致不事

浮藻士習為之一變祀犍為名宦並祀鄉賢

劉綱景泰丙子舉人授清遠知縣賑濟饑民創修學宮均賦役

勤撫字士民為立遺愛亭廣東名宦志

宋兌字繼東景泰丙子舉人授濰縣知縣專務以德化民不為

矯激之行秩滿奏留復任後陞濟甯知州山東名宦志

鄒澐天順壬午舉人授石泉知縣時經番夷之害民多逃徙澐

善於招撫復業者眾四川龍安名宦志

黃時中字宜之成化乙酉舉人授阿迷州知州時初設流官百

務肇舉時中善於撫綏得夷民心雲南名宦志

董紱應軫子成化壬辰進士授湖口知縣清慎惠民邑有蘇觀

渡水齧隄壞紱重築之民被其澤江西名宦志

邱瑩字北山成化甲午舉人授開縣知縣持政廉平榜其門曰

愛百姓如子受一錢非官卒祀鄉賢

王本儉字節之成化戊戌進士初任吳縣知縣改豐城其父遺

詩勸之因勒石後堂日夕自省邑大治歷桂林副使會蠻寇
譁本儉提兵討平之卒於軍

熊經字載道成化戊戌進士授無錫知縣有惠政諸生邵寶吳
學輩皆所識拔時有徐姓作石槨於太湖欲毀民居開河通

舟經弗許閱六年內召為人中傷出知隴州以疾致仕經性
剛氣豪善談論敦孝友有東溪集行世孫吉詳文苑分省人

舒崑山字楚瞻幼奇穎成化甲辰進士累官副都御史所至有
政績能文章一時碑碣多出其手明一統志

董樸字汝滄紹子成化甲辰進士任重慶知府明禮義正風俗
以艱去渝民勒石銘其德起知楚雄府課農桑立碉堡興學
訓士諸生貧不能婚葬者資助之陞江西參政解組歸做廬

終老為詩類陶韋時稱董五言卒祀鄉賢子士毅自有傳四川

李雲南名宦志文祥字天瑞正芳孫自幼俊異弱冠舉於鄉旋登成化丁未

進士萬安當國奇其才以孫宏璧與同榜款於家文祥意弗
慊也屬題畫鳩有春來風雨尋常事莫把天恩當己恩句安

深銜之孝宗嗣位文祥上封事請裁抑中貴選用大臣萬安
票旨謫陝西咸甯丞尋以王恕薦召為兵部主事監司以下

餽贖皆不納到官未踰月復以中書舍人吉人言事牽連下
獄貶興隆衛經歷都御史鄧廷瓚征苗咨以兵事大奇之欲

薦為監司文祥辭曰昔以言事出今以軍功進不可乃請齋
表入覲兩上疏告歸不許還經商城曲河冰陷死焉年僅三

十祀鄉賢

詳明史列傳及分省人物攷

周廷徵字公賢鑑孫宏治己酉舉人以教諭擢御史按陝西時安化王賓鐸反廷徵調榆林副總參游時源等分布要害令楊英為書密達仇鉞擒賓鐸並首惡何錦等械送京師都御史楊一清太監張永總兵始至永以功不由己乃追還賓鐸別自報捷又盡奪甯夏將士功與諸貴倖紀功給事中郟夔懼而自盡甯夏幾再變賴廷徵威望素孚又為撫定而白其功於朝尋陞九江兵備副使卒祀鄉賢子鈺自有傳分省人物攷

劉璉字士約訓孫宏治庚戌進士授豐城知縣興學育才邑好淫祀首毀之以正民俗自守狷介不私一錢徵斂有方姦猾屏迹述職為江右第一卒祀鄉賢子天和自有傳

唐書宏治壬子舉人授巫山知縣勅修石城民永賴之

四川名宦志

曾大有字世亨宏治癸丑進士授定遠知縣黷舍官解城郭坊

市悉增修誅妖賊孔布等一境晏然擢監察御史直聲震臺

端以忤劉瑾除名瑾敗累陟江西布政使卒祀鄉賢

分省人物攷

陳文字簡之宏治戊午舉人授崇明知縣遇風潮大變請賑濟

活三千餘人又擒海賊施珙父子以抗言忤巡按調延州尋

為襄府左長史文外和內剛居官清介歷任幾三十年田廬

如故著有自怡集

梅吉號西野宏治己未進士歷官惠州知府以白士子冤忤巡

按挂冠歸囊只俸金八兩清節冠時祀惠州名宦並祀鄉賢

子汝觀詳篤行

會大顯字世榮宏治壬戌進士累官禮科給事中忤劉瑾謫江西布政司照磨歷署參議所至有風裁以疾乞歸卒祀鄉賢子燧自有傳

毛馭宏治甲子舉人授太平知縣綜理有方剖決無滯吏民不

敢欺

浙江名宦志

劉天和字養和璉子正德戊辰進士授主事改御史出按陝西時鎮守中官廖堂奉詔辦御食物於蘭州使天和天和以非所司辭堂奏天和拒命詔逮之部民哭送者萬人久之謫金壇縣丞遷湖州知府多惠政累遷僉都御史督甘肅屯政請以肅州丁壯及山陝流民於近邊耕牧且推行於諸邊尋奏當興革者十事田利大興改撫陝西請撤鎮守中官及罷爲

民患者三十餘事誅洮岷番四十二族之不用命者討平湖店大盜及漢中妖賊就進右副都御史母憂服闋以故官總理河道時黃河南徙歷濟徐皆旁溢天和疏汴河自朱僊鎮至沛飛雲橋殺其上流復疏山東七十二泉自鳧尼諸山達南旺河濬其下流不三月訖工加工部右侍郎尋以兵部左侍郎總制三邊軍務倣秦綏隻輪車以禦敵屢破吉囊殺其子小十王論功加太子太保遷南戶部尙書召爲兵部尙書督團營言官論天和衰老遂乞休歸家居三年卒贈少保諡莊襄祀鄉賢天和初舉進士劉瑾欲與敘宗姓謝不往晚年內召陶仲文以刺迎稱戚屬天和返其刺曰誤矣吾中外姻連無是人仲文恚其罷官有力焉孫守有廕錦衣衛指揮亦

祀鄉賢守濠以恩例當廢讓其季父溧又以軍功當廢復讓其弟守孚守有子承禧掌錦衣衛士大夫獄急時頗賴其力

明史列傳

董士毅字維遠樸子正德庚午舉人授南充知縣一介不取有

青菜布衣破織羸馬之謠遷知蓬州清操益勵歸時囊無長

物正德三年大旱捐穀濟人瘞饑殍者不下數千卒祀鄉賢

劉淑相字養忠正德甲戌進士授南京兵部主事武宗南狩參

贊尙書喬宇選一人奉迎諸司皆憚淑相獨請往得旨還宇

深器焉嘉靖初晉郎中嘗跪伏左順門爭大禮歷任順天府

尹執法持正權貴多憚之未幾與內閣夏言訐奏下錦衣獄

尋放歸分省人物

詹瑩字廷玉正德甲戌進士南戶部主事歷福建參議性甘澹

泊耿定向先進遺風稱其在官時日用鹽點粥云卒祀鄉賢

毛鳳韶字瑞成正德辛巳進士授江浦知縣有善政擢監察御

史上弭災八事如復舊制以革鎮守尤關天下利害巡按陝

西雲南貪墨吏皆望風引退終雲南僉事著有聚峯文集卒

祀鄉賢明一統志

喻希禮字節之嘉靖癸未進士以重慶推官擢御史會議大禮

杖謫者多死荒徼希禮因禁中祈嗣上疏極諫世宗震怒尙

書夏言力掄之謫戍六安十餘年赦歸卒隆慶朝追贈光祿

少卿賜祭明史附薛侃傳

曾燧字日宣大顯子嘉靖癸未進士授獻縣知縣擒巨盜懲里

豪以能著御史某行部目攝之遂拂衣歸後擢給事中世宗南狩抗疏止輦廷杖下獄謫判靈州累陞福建少參拜命未就而歸卒祀鄉賢

參王世貞撰墓誌

劉采字汝質父漢宏治戊午舉人官商水知縣愛民好士卒祀鄉賢采嘉靖己丑成進士時張璁當國采為會試所拔高等特嚮意采不肯往謁補宿州知府屬歲饑采請移帑羨代輸至秋民爭償無逋者後巡撫山東采礦命下嚴急采疏請緩辭極婉剴獲允御史某請開膠萊河通海運采條其不便者五事遂寢先是詔近畿撫臣屯兵臨清備入衛後歲以為常士卒疲苦采疏請罷之累遷南戶部侍郎鎮武營卒以乏糧殺侍郎廷議以采代采至處以鎮靜凡運艦至戒主計者別

除一切積弊轉輸稱便反側乃安以災異自劾免穆宗立起南工部尚書改兵部尚書凡四載乞休歸采歷官四十餘年清介如一卒年七十四論祭葬贈太子少保諡端簡祀鄉賢

分省人物攷

案采父漢知商水縣時流賊劉六等竄境漢掘窟以藏家口及賊退妻女皆熏灼死惟一子七歲以鼻置土罅得免即采也

縣志

黃卷字景文一字萬巖幼聰穎強記少長工屬文廖學士道南見而奇之曰吾輩人也三年盡得其學嘉靖己丑成進士授刑部主事任職無害考最遷山西按察僉事所治太原為王國子侯爭民田而訟者王右之民每不得直卷至一切付三

尺無所依阿王更媿謝約束不謹丁外艱起復按察山東甫
至有傳敵騎窺臨清者巡撫會銑素才卷屬之城卷晝夜趨
事如期成大雨水溢城輒隕卷曰下必有伏淤也發土丈餘
而淤見乃去之多貫民間徹缶實以灰而基之城賴以固歲
稔民苦饑請於臺發庾粟贖緩以賑且多市二麥種貸民俾
無廢藝事明年麥大熟皆雙歧而七穗吏請以瑞聞卷不可
曰昔不聞災今乃聞祥耶遷陝西右參議制府議城花馬池
檄往督役卷操畫如臨清而嚴倍之樵者獲白鹿以獻或謂
當進諸朝卷曰是又且以瑞麥嘗我無如我騃何秩滿進甘
肅按察副使以河套之議與督師不合乃引疾歸年才四十
有五屏居田廬一椽僅蔽風雨課僮僕種時自給性好遊遇

佳山水輒登臨嘯詠不能去卒年七十五祀鄉賢

參王世貞撰墓誌銘

案卷解組歸服犢鼻禪躬督田事嘗從鄰舍借耒鄰人負

送卷曰但借足矣奈何復妨汝務因自肩還又嘗以隻雞

樽酒奉邑令曰瓦樽當見還令笑與之其清樸如此

王志僅載

此二事列隱逸放麻城志卷政績風節卓卓可表故移列宦蹟

劉濬嘉靖壬辰進士官郎中以不附權貴改汝甯通判為政嚴

明人不敢欺後復為南京刑部郎中卒祀鄉賢

周鈺字汝舉廷徵子任河南郊縣縣丞計擒巨盜僉事林騰蛟

激賞之知縣死檄鈺攝篆適嚴嵩私人鄢懋卿理鹽法州

縣無不贏金奉者吏白鈺鈺歎曰丞惟一身有婦耳何所得

數百金鄢至失望乃出故篋二付典史緝之鈺曰此欲借為

名耳陰備二新篋屬典史以所緝故篋入鄆大怒蹴破之鈇
陽謝曰何不以屬丞丞已備新篋矣鄆視篋則新也而中枵
然愈失望然無以難之已攝盧氏有老吏當戍者鈇待之厚
吏叩頭曰左藏贏金三千無知者請為公壽鈇得金具白諸
司充官用後還郊以豪右冒荒額爭於上官不遂憤甚投劾
歸子宏祖宏禴俱有傳

陳仲晦嘉靖丁酉舉人任石屏知州治海口建六間軍民稱便
雲南臨安
名宦志

董性士毅子嘉靖丁酉舉人授安岳知縣課諸生除巨盜斷冤
獄民立碑頌之擢易州知州至則為民興利立邊防永久規
以外艱去官服闋補合州合於蜀為劇郡又值歲祲性一意

撫字民無失所後致仕歸

劉瀾字汝觀嘉靖庚子舉人授銅梁知縣邑故多逋賦瀾嚴禁
催擾惟以牒付族長督率如期人無敢負者有盜魁朱宏仁
以賄通隸卒剽劫四十餘年瀾廉得隸卒寘之法復計擒宏
仁餘黨悉遁再知高陽邑多巨璫每以非理撓法瀾無所聽
璫以蜚語中之遂拂衣歸

劉廷舉字巨塘嘉靖庚戌進士授分宜知縣以不附權要調上
蔡尋擢袁州知府仁威並著郡大饑廷舉發廩捐俸施粥民
賴以活申明聖諭頒刻小學士風丕變去之日有澈底澄清
一巨塘之謠卒祀鄉賢江西袁州
名宦志

周宏迪字元惠嘉靖乙卯舉人授灌縣知縣政尚嚴明猾吏豪

民不敢肆陞石屏州知州四川名

周宏祖字元孝弒子嘉靖己未進士擢御史隆慶改元司禮中
貴及藩邸近侍廕錦衣指揮以下至二十餘人宏祖疏請止
資金幣悉停世襲且言願陛下勿與謀議勿假嘆笑則彼無
亂政之階已又疏請故侍郎薛瑄從祀請蠲淮南州縣被水
馬戶折價請汰內府監局錦衣衛光祿寺文思院冗員及仿
行古社倉法詔從之復因地震星變上疏略曰陛下嗣位三
年未嘗接見大臣咨訪治道邊患孔棘備禦無方事涉內廷
輒見撓沮內臣爵賞太厚謝詞溫旨遠出六卿上尤祖宗朝
所絕無者疏入不報其冬詔市珍寶宏祖復切諫尋遷福建
提學副使以忤高拱調判安順拱罷移廣平推官累遷南光

祿卿卒祀鄉賢子應嵩詳篤行明史

周思稷字養初隆慶戊辰進士授臨海知縣慈祥廉靜有古循
吏風在邑五年嘗清丈田畝稽核戶口不事察察而人不敢
欺又酌定鹽課上下利之陞主事歷參議卒祀鄉賢浙江名
孫一謙萬曆時為南京司獄給囚米甚均衣敝至為囚浣補一
切舊弊釐革殆盡囚深德之秩滿轉靈山吏目侍郎王世貞
為詩美其行

羅樹聲字伯實萬曆癸酉舉人授灌縣知縣以清敏稱西征之
役軍書旁午樹聲供億有方民以不擾又勅觀風樓為一邑
偉觀後陞西安府同知四川名

周宏禴字元孚宏祖弟倜儻負奇氣好射獵萬曆甲戌進士官

順天通判奏劾兵部尚書張學顏黨中官張鯨乞為屏放帝怒謫判代州遷南兵部主事時章奏多留中宏禴疏諫且請早建皇儲不報累官御史按甯夏巡撫梁問孟巡茶御史鍾化民取官帑交際劾罷之河東有二古壩宏禴易以石濬渠北達鴛鴦諸湖大興水利以誤薦呼承恩貶澄海縣尉天啓初敘建儲功贈太僕少卿子應泰詳忠義明史附李沂傳

魯之賢字伯良萬曆壬午舉人任深澤知縣北俗輕生之賢禁溺溢嚴反坐刑以是清奏最擢御史首劾罷貪撫張明綱巡按宣大會代藩廢長立幼上疏切論實為當時國本地也子晟詳文苑

王之機萬曆壬午舉人歷官四川參政會建昌猥亂之機受命

偕劉縉討之大小五十六戰諸猥巢穴一空改雲南復以才

幹機警著績滇藩莊兵為盜執法相忤投劾歸參明史

陳楚產字北學萬曆癸未進士授博野知縣清廉勁直百姓稱

陳青天遷兵部主事歸里數十年不起凡邑中利弊輒言於

令篤交遊不以貴賤易視梓里咸敬愛焉

梅國楨字克生汝觀子少雄傑自喜善騎射萬曆癸未進士授

固安知縣暇日輒較射每就射所決訟數語立遣有中官詣

國楨請收責於民國楨偽令民鬻妻以償民夫婦哀慟中官

為燬其券以政最入為御史會甯夏鎮將呼拜子承恩等據

城叛命國楨監李如松軍討之破其外援決黃河大壩水灌

城城中食盡援絕國楨挾諸將趨南關總兵牛秉忠賈勇先

登國楨援梯大呼諸將畢登賊退據大城國楨使開許以相

圖自效賊黨遂殺劉東賜許朝俘承恩以獻拜自焚死以功

累陞兵部右侍郎總督山西宣大軍務撫循邊徼恩信甚至

丁父艱歸卒贈右都御史祀鄉賢子之煇詳隱逸明史附魏學會傳

梅國樓字瓊宇國楨弟萬曆癸未進士選庶吉士歷遷四川敘

州副使時播會楊應龍反特起李化龍督軍務檄國樓隨軍

進勦國樓同將軍劉綎冒險出奇併力合攻播州平捷聞加

一級卒祀鄉賢王志注案縣志舊通志俱無梅國樓傳而舊志特載平播事查明史亦未及存以俟考

彭信古字叔錢萬曆癸未武進士累官瓊州遊擊朝鮮用兵信

古率步兵用大槓斃其渠魁眾軍繼進逼城濠毀其柵尋以

礮裂失利後乃敘功賜廕

楊王庭字中愚萬曆乙酉舉人授德化知縣江北地形窪下民

數千聚廬而居時夏流汎溢將淹沒王庭破浪拯濟築隄捍

之民感其德號楊公隄建祠以祀以忤礦璫調桃源縣晉廣

信府同知告歸戚族之貧者咸仰給焉卒祀鄉賢

詹淑字茂修萬曆乙酉舉人授資陽知縣公正慈廉條陳勸農

養生省用恤刑等議皆見施行後擢知府歸卒四川名宦志

彭好古字熙陽萬曆丙戌進士授歙縣知縣擢御史歷僉事剛

直不撓風格類古人弟遵古自有傳

蔡茂春萬曆壬辰進士授建德知縣興學育才勸農積穀捕盜

恤孤設義家立小學興利除害無不條舉浙江名宦志縣志作天啟壬戌進士

曹大受字無可萬曆甲午舉人授浙江新城知縣理滯獄鋤巨

愨因性鯁介左遷蜀藩典簿會奢賊變募死士擊之以功擢貴州兵備副使意有不合竟拂衣歸

李長庚字孟白號西卿父承祚以和厚稱教子有法度卒祀鄉賢長庚萬曆乙未進士授戶部主事歷江西左右布政除解費察吏弊清介絕俗入為順天府尹京畿荒旱疏請平糶賑饑免稅皆朝上夕可改副都御史巡撫山東盡心荒政民賴以蘇盜蔓武定諸州縣討擒其渠魁遷戶部侍郎督餉天津時諸事枘始百務全集長庚悉辦治晉刑戶二部尚書以憂歸崇禎初起工部吏部尚書帝嘗褒以勤勞清慎六年修撰陳于泰疏陳時弊中官王坤力詆之侵及首輔長庚上言內臣輕議朝政流禍無窮為萬世口實帝不懌又與溫體仁不

合遂削籍歸家居十年卒祀鄉賢

詳明史列傳

楊之彬萬曆丁酉舉人任姚安知州省獄訟平賦役蠲苦丁復

鹽市修學宮一州利弊盡為釐舉其開擴城郭功尤著後陞

同知

姚安名宦志

熊所師字呂源家貧歲歉有知交餽稻數十斛分給親友立盡從弟妹不能自存者教養婚嫁之萬曆丁酉舉於鄉授贛州推官守將縱兵剝民按法劾罷隨為州將所中謫廬州州判州有豪強犯法前守屢捕不能得所師攝州事擒寘諸法後調北流知縣卒櫬歸貧不能葬

王育德字澤寰萬曆庚子舉人初任嵩明知州東川土蠻之變以擊賊功陞僉事尋知永昌府佐巡按擒斬叛蠻馬一駿分

巡臨元規復十八砦觀察黔中銅平蠟耳山苗倡亂率兵入其界撫之黔賴以安累官陝西右布政使入覲卒於京梅之煥字彬父國楨從子少孤從母日課書盈寸侷儻異凡兒年十四爲諸生御史行部閱武之煥騎馬突教場御史怒命與材官角射九發九中長揖上馬去萬厯癸卯與楊漣同舉於鄉以功名節義相期許甲辰成進士選庶吉士改吏科給事中東廠太監李浚誣拷商人之煥抗疏劾之出爲廣東按察副使擒誅豪民之沈殺烈女者民服其神海寇袁八老掠潮州殺守吏潮非之煥所部自請往嚴兵扼海道散其黨八老乘潮遁乞降於閩之煥督學山東八老率舟師援遼謁之煥於登泥首謝曰海上之役畏公天威故走閩今公在此某

敢不爲公死乎之煥溫語遣之其視學闕略教條謝絕請託暇輒進諸生於庭賢者降階迎不肖者申以夏楚諸生悅服天啓閒巡撫南贛丁艱家居時魏璫興大獄逮楊漣拷死因擿漣黨以之煥爲首坐削籍逆黨梁克順誣以賊私復坐追贓遣戍莊烈帝卽位以原官召巡撫甘肅大破套寇威服邊方聞溫體仁用事遺書中朝暴其過會京師戒嚴有詔入衛瀕行西部入寇之煥留甘肅戰敗之復西定悍卒王進才之變抵京師已後時體仁修隙指劾之遂罷歸邑阻山多盜之煥率健兒助吏搜捕無脫者流賊起秦隴蔓延光黃閒之煥用軍法部勒鄉人立堡與邑治相犄角賊不敢犯所全活數十萬人崇禎十三年復官卒卒之日里人皆巷哭失聲

明史參建寶

陳以聞字石泓萬曆丁未進士授吳縣知縣調無錫行均田均役法發運弁勒兌狀數決大獄甚有風力晉尙寶寺丞以與楊漣高攀龍善忤魏璫削籍崇禎初起官累擢刑部侍郎被論歸卒祀鄉賢

周崇極字無所萬曆己酉舉人任南陵知縣有中涓奉差歸輜重絡繹役夫不堪其苦內有蘭花數百盆崇極碎其一則金珠寶其中將盡碎之中涓氣奪急出金自募役人咸快之陞貴州僉事有叛苗御史執使治罪崇極給苗冠帶且誡曰姑貰汝罪效順則止不然將盡戮無赦諸苗喜相戒勿叛朝議善之

劉鍾英字俊卿萬曆癸丑進士官翰林值梃擊東宮一案舉朝

沸騰或勸上章鍾英曰皇上誠慈皇太子誠孝忍不爲君父留餘地耶明日太子果下令禁外廷無妄言眾乃服其識天啓辛酉典試闈闈崔田等嘆不附黨削籍歸自是楊左大獄興一日梅之煥憤甚過鍾英言欲往京一語伴楊左諸君死鍾英爲言忠激忘身無異抱薪救火向使唐李訓鄭注少濟以狄梁公之學問何至仇士良殺二王一妃四宰相耶梅意乃解崇禎元年起官祭酒尋遷吏部侍郎再疏乞養疾歸周宏謨字元文萬曆時武進士官遊擊同李如柏等戰平壤會倭關白陷朝鮮王師敗朝用沈惟敬議款令宏謨同往諭倭就款還疏倭情甚悉復遣往議封貢至朝鮮仁施縣病卒贈都督僉事廕黃州衛千戶

劉僑字東卿天啓時襲祖天和錦衣職授北鎮撫司魏忠賢屬

陷汪文言以株累正人僑不從削籍歸崇禎初起用為五城

都督命訊喬允升易應昌之獄僑素知二人端方保全之後

委緝六部十三省事僑極言耳目難信忤旨謫戍馮元颺疏

僑忠直宜還職報可未用卒

明一統志參通志

鮑之祥字若孩崇禎辛未進士授臨川知縣時軍興加派祥不

忍鞭扑涕泣勸諭值編審召里長聚庭下面均徭役吏不敢

欺平居蔬布自奉一如寒素

江西撫州名宦志

周損字遠害少與劉侗遊京師共著帝京景物略崇禎己卯舉

於鄉癸未會試登副榜授饒州推官值馬士英兵過樂平民

苦其擾聚眾殺數人英怒欲屠城院司議執殺兵者以獻樂

平民不聽上司檄損攝縣事損單騎往諭民皆投戈乞命損

曰隨吾來策汝以不死從者數十萬人損白上司曰兵民相

殺適足相當復重戮吾民恐激變今國用告匱若以償金諭

必從如不從職敢任其咎民間歡聲震天損首為捐俸次視

民貧富斂之共得萬金以報且許續金若干城得免屠及索

所許損屢以空文婉謝事遂寢損學問淹博詩文皆有稱

黃安縣

吳琛字文錫應澍子少好學修父業與兄琳齊名授衢州同知

盡心奉法政多偉績

耿光字謙甫宏治辛酉舉人四任教職以春秋歷聘分考所在

得人初應四川聘有貴勢遣人以重賄丐錄其子光焚其書

磨使去性篤孝念養不逮親居常悲愴賦詩見志誦者感焉
方民懷字懋元嘉靖庚子舉人絕跡公府嘗寓旅舍有女來奔
叱之女跪曰父爲債窘故爾急與囊金遣之去任林縣知縣
五載多惠政監司臨以非禮遂解綬歸囊無一錢卒祀鄉賢
弟民悅字懋德乙未進士官至廣東兵備副使嚴緝海盜洋
面肅清商賈悉受其惠及卒民爲立祠祀之

周思敬字子禮隆慶戊辰進士除工部郎出備兵甯州參政涪
州皆著奇績遷南戶部侍郎主事趙學仕侵牟有罪恃奧援
爲解思敬劾之擬戍時議援朝鮮思敬抗陳不可俞旨報罷
朝野震服倭寇起思敬護解兵餉協同劉綎討平有功卒贈
工部尚書孫世甯博覽羣籍事孀母以孝聞

彭遵古字曰陽好古弟萬厯丙戌進士與顧允成友善耿介勵
名節當釋褐初會南御史房寰連疏詆都御史海瑞遵古同
允成諸壽賢抗疏爭之略言寰妒賢醜正不復知人閒羞恥
事臣等自幼讀書卽知慕瑞以爲當代偉人寰大事貪污聞
瑞之風宜愧且死反敢造言逞誣臣等所爲痛心因劾其欺
罔七罪始寰疏出朝野多切齒而政府庇之但擬旨譙讓及
得遵古等疏謂寰已切責不當出位妄奏奪三人冠帶還家
省愆久之遵古以御史言起用終光祿少卿

明史附顧允成傳

周家棟字隆之萬厯己丑進士授臨海知縣清理徭役修築湖
隄民懷其惠課士有知人鑒一時儒習斌斌焉尋擢御史巡
鹽兩浙老穉數百里擁馬足歡呼曰此我曩時父母也卒祀

名宦初探礦命下黃安有河名金場姦胥妄指以累平民家

棟為之奏罷邑人德之亦祀鄉賢浙江名宦志

韓邦哲字貽初萬曆辛卯舉人壬辰會副任涪州知州廉明耿

介士民畏而愛之秩滿晉東昌同知發姦摘伏羣邪斂跡檄

所屬罷煩役省浮徵徧猶之風一變熹宗朝以魏璫擅權乞

休歸郡人為立去思碑崇祀名宦

吳化字敦之萬曆乙未進士授鎮江推官數斷疑獄民有壓死

者誣為諸生某撲殺化案之曰撲人者右其手理宜橫今縱

而左非撲也民乃服遠近神之累官戶部主事卒祀鄉賢子

光龍詳文苑

盧堯臣字贊勳萬曆庚戌進士授益都知縣邑多貴勢堯臣持

法不撓被中傷謫去久之起濟甯府甯前衛推官致仕歸卒

祀鄉賢子爾惇詳忠義爾悌詳孝友

王之策萬曆中由選貢授通江知縣如槩飲冰鋤強剔蠹善於

撫字四川名宦志

秦植字立之萬曆己未進士授全椒知縣未下車即發諸吏姦

蠹狀至則杜苞苴除耗羨薄稅通商調桐城知縣去時惟攜

布絮一篋而行在官時有勢宦因壻家中落欲悔婚丐於植

植曰第以白金數百來令女一出質斷之易耳宦如其言比

就鞫植曰君所以如此者嫌壻貧耳今不貧矣因呼女入室

治匳具嫁之時論無不稱快後陞吏科給事中江南名宦志

吳士伸字季舒生有異徵鬚齡失怙執喪禮如成人以諸生遊

成均除南京典膳署東城兵馬司時闖賊犯順土伸分門
設守賊不敢近以直忤時謫澉水簿就權鄆縣旋攝申州修
城垣集流亡賊來攻土伸親冒矢石擒殺甚眾去後申人思
之立碑頌其德著有司城紀略雉山園小吟子之珍自有傳
程繼善字明起以歲貢授安慶推官訟無留滯有某將勢驕橫
繼善列其狀逮繫之世爵崔某祖墓木爲健兒竊伐反受誣
抵重辟爰書旣成立爲昭雪崔德之立祠祀焉解組歸流氛
四起立堡大勝山訓練鄉民隱然爲一方保障子之渾詳篤
行之渡詳忠義

耿應昌字公府定向孫由恩蔭歷官刑部主事疏言廠衛之弊
降上林苑監丞遷戶部復以前疏降廣西布照磨值播叛全

省震動應昌往撫之搖悅服饋萬金弗受尋陞雲南楚雄府
通判致仕歸順治初以原官起用年老不赴終於家

羅田縣

程瑩精易學兼善草書少喪父事母盡孝繪思親圖朝夕奉祀
如生又置義田供祀事由吏員擢禮部郎中出爲瓊州知府
以興學爲首務凡登科貢者皆所拔士邱濬時未遇瑩拔置
第一並資給以成其學後爲名臣瑩卒於任宦橐蕭然以眾
賻始得歸葬瓊人立祠祀之並祀鄉賢

參邱濬撰墓誌銘

周楫蕭洪景泰癸酉同科舉人楫官知縣以清慎稱尤喜獎進
士類洪三任教職亦以廉介聞所得俸資悉周諸生貧乏後
陞固始知縣俱祀鄉賢

聞韶成化戊子舉人授石城知縣才識敏給防禦廣寇兵食恆足開擴城池至今賴之江西贛州名宦志

王澄字克清正德甲戌進士初為番禺知縣祛妖僧表貞節政績卓著擢戶部郎中時尙衣監王振奪民間田產園林澄奏還之復歲省租役銀一萬三千兩督淮餉值歲饑割俸以賑

全活甚眾歷河南山西參議皆清慎有賢聲卒祀鄉賢東志

王德純字一之正德丙子舉人授襄城知縣擢御史出為姚安知州剛明正大不事苛繁新棟川書院修儒學遷養濟院士

民咸懷其惠雲南名宦志

葛鴻字子中正德辛巳進士選庶吉士擢刑科給事中會戶部

主事羅洪載以杖錦衣衛百戶下詔獄鴻與同官安磐等抗

疏請付法司不聽出補知府參楚紀明史

張明道字希程少有大志不屑世利發明朱子綱目啓迪學者

年五十成嘉靖己丑進士授都察院都事累官江西按察副使敷歷中外政績著聞為一時循良冠卒祀鄉賢

王榆萬曆乙酉舉人知六安州惻愍無華每朔望向神誓曰愛

民不及愛子殃及我子治郡不及治家殃及我家民感其恩

為建生祠江南名宦志

蕭魚萬曆庚子舉人由汝州學正遷溫江知縣勦奢寇有奇功

擢工部主事時魏闖柄國魚不為屈出知登州府清操如水致仕歸卒

王先字思侗萬曆丙辰進士學問宏博識見明通臧否人物悉

當任溧陽知縣戊午分校南闈得士六人聯捷南宮者五陞刑部主事理刑淮安卒於官溧陽士民間之立祠以祀

國朝順治八年湖北學政狄敬溧陽人也甫下車檄取先行述請祀鄉賢

汪吉舟歲貢生河南臨漳縣丞徐志亮拔貢生山東武城知縣均清正有聲志亮擢御史俱祀鄉賢

蕪州

康茂才字壽卿元末進士時寇陷蕪州茂才結義旅保鄉里尋從明太祖渡江太祖命為都水營田使興屯田陳友諒窺應天茂才設伏大破之攻左君弼於廬州從太祖伐友諒大戰鄱陽湖伐張士誠大戰尹山橋俱克捷遷同知大都督府事

從大將軍徐達經略中原留鎮河中撫綏瘡痍民立石頌德陝西平留鎮山西後從漢中還軍道卒贈蕪國公諡武義祀鄉賢子鐸自有傳

明史列傳參通志

康鐸字伯聲茂才長子襲封蕪春侯少有父風年十歲侍太子讀書大本堂太祖灑宸翰賜之曰謹承祖業愛爾勤功詔往墾鳳陽荒田年十八統兵討平辰州峒獠後從征南將軍傅友德征雲南克普定破華楚山諸砦明年卒年二十三贈宣力武臣蕪國公諡忠愍

陳堯章博通經史精校讐洪武初任臨安知縣興利除害惠愛及人以勤勞致疾卒時有趙霖任鳳陽府通判贊畫時政率多裨益俱祀鄉賢

黃安泰洪武初知彭澤縣時兵燹後民物凋瘵安泰以廉勤為政百廢具舉民賴以甯

馮思齊字賢希洪武初以貢入太學儀度瓌偉上幸學見之尋擢御史初為諸生時與百戶黎暄有隙及按江西暄被誣繫九江獄思齊平心直之後以言事激切謫雲南推官尋召還卒祀鄉賢

朱彤字彥功洪武丙子舉人官紹興通判廉正有威人不敢干以私去官送者聞郊父老流涕而別浙江名宦志

熊翼永樂甲辰進士宣德中為御史巡按陝西劾鎮守中官占種屯田擅役士卒上嘉納之正統四年授僉都御史督甘肅軍務鋤豪強恤軍士在邊十年以剛正見稱擢副都御史致

仕卒祀鄉賢通志

宋誠字彥實正統戊午舉人授徐州知州器宇才能迥出人表一時吏民畏服陞敘州知府曠賊亂練鄉勇守禦復從大軍征勦賊平蜀王入告陞榆林副使卒祀鄉賢子璧詳孝友江名宦志參白茅堂集

陳溱字濟寬正統甲子舉人授工部主事督濟甯河閘值中貴樓船有犯禁者繩以法中貴銜之誣以他事逮詔獄謫戍貴州清平徧溱慷慨就道至則日持戟從事憤激賦詩怨而不怒有風人之遺著有獨醉堂稿卒祀鄉賢

張禧字吉夫景泰庚午舉人授推官性伉直人不敢干以私讞獄多所平反遂與長官不合丐歸家貧甚州大夫聞而周之

悉不受卒祀鄉賢

王翰字廷舉天順丁丑進士累官廣信知府廉謹愛民不阿上官嘗陳便民七事直指時弊僉事陳騏按部苛細翰不為動會大理卿夏時正巡視摘陳言事罷之百姓乞留不得歸構數楹校讐古書絕口不及世事年八十五卒著有萬松窩集

祀鄉賢

華仲賢字廷佐成化乙未進士授刑部主事時潞城知縣王濬貪酷賢按治其事不少貸歷官廣東參政會採珠命下賢力革舊弊事集而民不擾擢布政使以廉靜稱後引疾歸卒於家祀鄉賢子巒詳文苑

甘澤字仁夫成化丙午舉人歷教職甄陶有法陞渠縣知縣擢

禦鄴寇邑賴以全渠人繪像祀之歸輯州志九卷斬舊無志

勅始之功後人賴之四川順慶名宦志

馮翱字時舉宏治歲貢生初為諸生時比舍火起翱自外馳歸負其母及先世誥命出餘無所問後為宛州推官治獄平恕郡守委督所屬逋賦故有賂遺或以例告翱驚曰此何例耶召賂者亟還之卒祀鄉賢子鵬詳孝友參通志

張思齊字希賢宏治乙丑進士授四會知縣水患洊臻民聚為盜思齊設法築隄遂成膏壤民阜盜息遷知亳州白蓮賊趙景隆掠歸德思齊偕指揮石堅擊斬之賊平陞四川僉事疏治麻衣河民便之尋備兵建昌勦雅州苗族為亂者鎮守中貴人欲攘其功誣思齊混殺良民逮至京事白改霸州民有

黃州府志卷之二十一
訴中官奪產者思齊上其狀部使者不報遂投劾歸後起瓊

州兵備僉事累官布政使卒祀鄉賢參通志

陳大中字時甫正德戊辰進士任南戶部主事積羨金還公帑擢慶遠知府所屬土官舊例各以金銀器物爲贄大中拒不受獐會藍錢壓爲寇商旅非結眾持械莫敢行大中率民兵擒渠魁戮其黨數百人事聞擢轉運使卒祀鄉賢參通志

劉樽字宗器勤苦嗜學年五十始登正德甲戌進士授海豐知縣改遂甯俱能以德化民循聲懋者擢知鶴慶軍民府取道還省墓以疾卒祀鄉賢

高鵬字汝南正德丁丑進士授涪安知縣尙書喬宇薦其才當道忌之左遷亳州判官移知南充訊獄果斷不畏強禦士民

仰其德歷重慶知府蜀藩長史著有四體發蒙秉忠定論省

心全要等書卒祀鄉賢四川順慶名宦志

甘澧字鍾衡嘉靖辛卯舉人授旌德知縣時條編未行澧裁省廚傳寬里甲諸費有中貴過縣索供億橫甚澧但致常餼而已中貴度無所得乘傳去江南甯國名宦志

馮天馭字應房號午山鵬子天性寬厚篤於孝友嘉靖乙未進士授大理評事改御史兩任京畿學政設科重行誼敦廉讓崇表貞孝修諸名人廢祠大學士王試時年十二天馭極器重出東坡稼說授之生平學有本原深契鄒東廓宗旨霍渭崖常語人曰馮應房何其溫而能立也累官刑部尙書致仕歸於雨湖建臥雲樓校刊文獻通考學者稱午山先生卒祀

鄉賢

吳鳳瑞字翼靈嘉靖乙卯舉人冠後始習舉子業以理學為鄉里倡任太和教諭有師範督學檄主正學書院遷永豐知縣轉開封通判有浚河功擢兗州同知以直忤當道當道廉知其端方愈優禮之

徐之徠字子迎方七齡即毅然有閉戶之志嘉靖戊午舉人授梁山知縣蘇困減徭冰燄自矢調武進不避權勢以病免卒年九十有二祀鄉賢著有性命集

周祚字台峯嘉靖戊午舉人授海澄知縣邑新造難治祚墾荒招逋戶口以實復覈賦清徭絕蠹食之弊後官郎中福建名宦志王之佐字以才嘉靖辛酉舉人初任懷遠知縣舉卓異歷工部

員外郎督理河東牆并朝日壇竭力盡心後以廣南知府致仕歸閉戶讀書不入城市卒祀鄉賢

周禧字子吉生有異徵性孝友嘉靖壬戌進士官御史風裁凜凜出按浙江築海塘嚴海禁毀除淫祠妖僧消地方隱患旋擢江南提學副使正學術釐文體人文奮興以勞疾卒祀鄉賢

李建中字龍源時珍子性至孝十歲能文十二為諸生有巡按御史舟阻風駐驛諸生入謁指柱構橐孔曰楓木年深生孔子建中應聲曰菊花秋老見黃香御史奇之曰子才位當亦黃公一流嘉靖甲子舉於鄉任蓬溪知縣以廉稱潼川旱禱即應呼為李公雨尋擢永昌同知因親老謝歸著蜀遊草明

黃州府志卷之二十一
月山詩數卷卒祀鄉賢子樹初詳忠義

李孟春字愛池隆慶丁卯舉人授西平知縣官箴清肅歲旱鬻產佐賑不忍開徵爲撫按所劾民泣控願完積年逋當事疑之徐查覈果全完歎曰有牧民若此者乎極爲雪救尋遷刑部主事以養親乞歸卒祀鄉賢

李盛春字夢池孟春弟隆慶辛未進士選庶吉士改吏部時東宮未正位叩閣特疏詞甚激切後出撫保定礦璫肆虐四方騷動盛春力請停役爲太監王虎所扼然在任數年核兵馬綜錢糧卓有成績亡何黨議紛起盛春方晉南兵部侍郎堅意乞歸尋卒賜諡恭質諭祭葬祀鄉賢

李際春字和元孟春季弟萬曆丁丑進士授歸安知縣時詔量

郡邑田豪右隱占獨累窮民際春按籍履畝未嘗少徇累遷汝南副使平礦盜沒心秤之亂歲饑拮据荒政全活甚多以勞瘁卒祀鄉賢際春天性孝友嘗訓其子曰吾居鄉居官惟以鬼神二字時時在念汝輩宜知之子樸詳孝友樾詳忠義孫本晟自有傳

李載陽字旭峯萬曆丁丑進士授洛陽知縣丈地清徭百姓稱便後以南御史出知漳州府加意學校歲饑多方賑恤客役夜譁廉其魁寘之法眾皆讐服累陟太僕少卿

參河南福建名宦志

張星字聚薇萬曆壬午舉人授如皋知縣邑有沙田歲苦水漲壓沒星捐俸從海灣濬河導水入海農以有秋又鹽場舊例每一撤丈費商人數千金星單騎裹糧而商不擾中官怙勢

滋害星正色不為屈遷歸德府同知卒祀鄉賢

夏忠字孺和萬曆辛卯舉人授桃源知縣時苦海寇忠修葺城堡嚴保甲萑苻無警遷知鄧州革羨餘有大辟繫獄者百餘出脫九十二人梓有鳴冤錄陞思明府同知致仕歸築清白堂先人墓側著有文禁十卷蘄州志八卷卒祀鄉賢

汪宗文字綱先萬曆丁酉舉人授上高知縣民瘠而玩惟務惠綏不專倚法民以感動逋賦應期告竣入為部郎權河務鈔關除羨耗累官雲南副使所至有聲晉階右布政告歸居鄉恭謹里人懷之卒祀鄉賢

袁世振字抑之萬曆戊戌進士授臨川知縣善論文識艾南英於童子時陞戶部郎時邊餉仰給鹽課鹽法久壞商引不行世振為十議上之神宗覽奏嘉其能特命為兩淮疏理鹽法副使賜璽書疏理之官自此始世振立十綱羣商歡赴期年舊額外溢七十萬上降敕嘉獎凡疏理四年助邊餉入太倉四百餘萬會嫉者謀去世振用其黨遂乞歸崇禎初起揚州海防副使未赴卒著有鹽法綱冊十六卷子素亮詳文苑
晏攄忠字元灝萬曆庚子舉人授廣州海防同知歲應支放軍餉四十八萬攄忠不隱纖毫瓊州生黎與熟黎構禍當事者勒兵深入後援逗留前軍盡劬攄忠監紀其地策情形急白大府只固藩籬後行其議遂寢兵陞廣西副使著有粵政條議卒祀鄉賢子昇詳文苑

王臣紀字爾瞻萬曆丙午舉人任江山知縣有巨猾柴某武斷

鄉曲已復聚謀不軌臣紀立除之陞泗州知州時魏璫脅附
數乞歸不予告尋丁外艱歸遂不仕卒祀鄉賢弟臣縉字大
紳崇禎庚辰進士授錢塘知縣忤大吏罷歸順治初入閩魯
藩授分巡副使兵敗遂為僧著有麟經稿行世書法尤精

茅堂文集

李楷字端甫同春子萬厯閒襲千戶職授靖州守備隨劉綎征
苗播攀藤越樓山關立奇功加世襲指揮陞浙江參將會海
賊入犯設奇大破之累晉貴州總兵歸里居喪廬墓兄弟雍
睦及卒弟棟嗣其爵楷後祀鄉賢

李雲慶字紀卿時珍曾孫天啓丁卯舉人初任將樂知縣潔清
自矢勸農桑興學校調泰甯昭雪疑獄乞歸日行李一肩送

者為之流涕

福建名宦志

李猶龍字又明天啓歲貢生任石屏州知州值普名聲叛攻圍
臨安州有土人倡亂立樊之境内肅然率民固守賊不敢犯
州賴以安

雲南臨安名宦志

梁佳字士奇廩生任壁山縣丞有惠政以終養歸建烟光樓築
險禦寇邑中事多賴焉卒祀鄉賢

廣濟縣

徐麟字月齋太祖起兵由儒士辟舉洪武初授宣武衛鎮撫歷
河南府同知百廢俱興郡邑稱治時元降臣宋玉集散卒謀
夜叛以刻漏為期麟廉知之戒司漏者故遲緩玉疑不敢發
黎明遣邏卒盡獲之以功擢知府後調蘄州歷永道房三州

俱有政聲卒祀鄉賢子文顯由薦授刑科給事中忠直敢言
後擢刑部侍郎

楚紀

張根字伯原洪武中以歲貢為順昌教諭永樂間轉太子少傅
侍皇孫講讀仁宗卽位諭諸臣曰張根誠實可用然老矣宜

優逸之遂以本官致仕歸卒祀鄉賢

案張根一作永樂時歲貢

王佐監生永樂間授徽州府同知有惠政遷知饒州府廉靜寡
欲以德導民後免歸僚屬贖以金不受人益重之因立卻金

亭於江潯卒祀鄉賢

楚紀

鄭達字叔通永樂癸卯舉人任蓋屋知縣開渠溉田千頃調崑

山值大荒廼贏盈道路民哭達亦哭煮粥賑之疫作廣設醫
藥多全活重學校恤窮發自奉清約圖書外一無所好卒祀

鄉賢

陳創監生永樂中任監察御史整肅風紀歸休日篋無寸積及
沒其殯葬皆里人所賻祀鄉賢

陳愷正統辛酉舉人歷戶部郎中性敢言不避權勢出為重慶
知府於孤制暴郡人賴之卒祀鄉賢

王弼正統歲貢生官山西道御史糾貪墨決疑獄風紀獨持吏
民畏服

張易宗字祖義宏治乙卯舉人任聊城教諭訓士多所成就擢
判瑞州有解餉四人私折印封府欲致之死易宗爭之不能
得因閉閣謝事時兩臺獎易宗廉使者至府乃釋焉隨陞雲
南鹽提舉卒祀鄉賢子顯廩生性至孝以扶母櫬哀毀卒頌

價自有傳

王欽正德歲貢生任巫山訓導捐俸給貧士類稱義陞蜀府教授正道匡弼登對不阿歸事繼母以孝足不抵公所鄉士大夫咸尊重焉卒祀鄉賢

呂用聘正德歲貢生任祿豐知縣督民耕種其俗桑麻成不知織經躬教為紡具使夜作民感之為立教織亭郊多虎患作文驅之虎大哮而去

張穎字平岡篤志好學嘉靖乙酉舉人授舞陽知縣為政務飭大體釐弊竇鋤強悍邑中神像皆易以木主曰鬼神何常形而儼然貌臨人乎盡毀之後官通判

文大才字希周宋信國公兄天禎十世孫九歲為諸生父早逝

事母方祖母董色養備至嘉靖壬辰會試登乙榜授封邱知縣甫三月百務犁然會當道以事怒他令盛氣向大才語大才恚移疾自罷不待報徑歸兩臺才之檄郡敦諭還是時武進薛應旂知慈溪縣亦不待報歸並追還洵異遇也尋調嘉定嘉向有茶課吏緣為姦大才悉剔罷商賈便之晉興化同知致仕

李觀字賓卿嘉靖丁酉副榜任瀘州知州瀘密邇牂牁烏羅雜處觀至葺雉堞詰姦宄地方以安瀘累年逋賦多流亡觀具劄以請獲免十之四奉檄治餉烏撒軍民府當受代日存羨千金置不問主者遣吏持至中途以成例請觀曰不受羨即吾例也卒散之軍吏以疾歸卒于甘來自有傳

張頌字用之易宗子嘉靖歲貢生博極羣籍工詩善書法性篤厚父病衣不解帶者三月及卒哀毀骨立督學黜徐生某欲選頌頌不忍奪竟謝去授潯州通判署桂平知縣有富民王寶者爲仇家所陷獄已成頌廉而脫之寶屢以苞苴壽不受弟價號衢南嘉靖癸卯舉人與江陵張居正相得官國子學正以病卒於京居正哭之哀爲賻斂治具歸其櫬與孤初價妻劉氏目盲或恐以盲故易價曰吾不妻盲誰妻之者及卒劉泣血扶櫬南歸

饒之初字子復嘉靖丙午舉人授孟縣知縣孟故孔道輪蹄輻輳始剗田租賦馬匹後田租轉徙不常里馬如故之初奏記所司請均賦置馬遂爲定規他如招流亡除姦蠹建社學善

政畢舉值臬司行部索金不獲銜之會大計屬考功左遷岷府審理致仕歸孫嘉元詳文苑

孫喬字木齋祖英孝豐知縣有政聲卒祀鄉賢喬以嘉靖癸丑進士授戶部主事奉督南漕不激不隨人咸稱便復命道卒亦祀鄉賢

張步雲字子龍嘉靖辛酉舉人累官太平知府時會長例得襲一曾未有子犯法繫獄直指錄囚曾得偶歸而婦娠生子其弟賄謀襲誣子非曾出步雲卻其賂刺血驗之以情申監司監司受賂不之直步雲棄官歸會長隄兩決五縣爲魚步雲時年八十四爲書數萬言控兩臺各捐金修築至今賴之卒

祀鄉賢

參通志

劉天衢字一登隆慶辛未進士授中書舍人萬曆初選監察御史憂形於色耿定力怪問之曰監察職不易稱也無何御史傅應禎劉臺咸以論列首輔張居正被逮天衢毅然疏救卒獲保全遷陝西參議駐興安先是興安患水災天衢下車議賑捐貲築隄濬濠全活甚眾累遷雲南副使時巡按汰客兵兵鼓譟執同知強為帥天衢穿隧通賊臥榻密出之遂平賊遷金滄道左參政值緬甸入寇乃移駐賊衝集八郡材官及諸司土兵分討之凡四閱月盡復所陷地遷山西按察使加太僕卿致仕

參通志

湯之相字惟尹少貧父為縣吏不能自給之相假市肆貿易取資夜讀萬曆丙子舉於鄉由學訓為南助教晉刑部郎出知黎平府地雜苗獠之相釐定嫁娶科條使男女有別俗殺人

不抵惟以銀贖故仇殺益多之相不為未減乃少戢催科外不濫取一錢黎民懷之

王大謨字維允萬曆庚辰進士授太湖知縣甫八月御史按視才之薦為刑部郎適中宮父錦衣張某卒孽子爭財自殺下部鞫所由尚書密屬大謨大謨至其家慰弔引見其穉子蒼黃訊之得實歸具詞平允錦衣嗣子得全上與中宮大悅每歲熱審中官例至大理寺南嚮坐尚書以下皆侍大謨曰春秋尊王人而奄尹不列朝署使者當下中官怒大謨抗疏極論之不報後督學雲南捐俸構五華書院聚諸生講業遷廣西左參議以母老乞歸薄田數畝外無餘羨焉卒祀鄉賢

徐來聘字任卿父鼇舉人翰林院孔目素精理學與廖道南等
日夕講論來聘萬厯歲貢生厯官永甯知州有猺獞相仇殺
大憲密檄勦之來聘不忍單騎詣營諭以禍福翕然歸化後
解官歸士民祀之

徐來建字明卿萬厯乙酉舉人任壽州知州壽近濠河時爲患
丁徭偏重來建奏記臺使懇均二賦租歸田庸歸丁悉劑其
平臺使爲奏可民困用蘇轉蘇州同知以艱歸子甲猷諸生
輕財好義以文著

張嵩字太室萬厯甲午舉人爲南雄推官有善政晉南大理寺
正與黃葵陽郭青螺相契所往復書皆經時理政之言遷潯
州知府有異教妖祠煽眾謀作亂官兵率爲所扼嵩密計招

誘遂散去臺臣以爲能表薦方超授兵備中忌者言遂致仕
歸

舒其志字元渚父賢事親至孝年四十夢神贈雙璧始有子長
其心次卽志也登萬厯乙未進士授行人擢四川督學藻鑑
如神得人稱盛陟江西按察使時淮王欲立寵倡子而錮世
子於祕室倡子左右皆羣盜出沒彭蠡聞其志初弗問忽夜
半出片紙捕其黨賞之法面責王王立出世子而殺倡子稅
璫李道爲暴於湖口鳳凰磯其志計縛其魁送九江獄眾校
爭投水其志故爲之畫曰若住此吾知不免惟束裝宵遁耳
璫果遁尋得旨所稅仍屬戶部鈔關居民祠祀之遷江西布
政使歸卒與父賢俱祀鄉賢子簡默皆知名孫益生詳忠義

芝生詳篤行

湖廣通志

吳亮嗣字明仲萬曆甲辰進士授南充知縣治最擢兵科給事中數上疏時多留中而亮嗣獨得報神宗朝異數也嗣感激益請勵精圖治節冗費裁稅璫時滿朝薦劉光復因事繫詔獄嗣請釋之又疏理熊廷弼之誣及董其昌張濬等人材可惜因張差事請申飭禁衛又請飭京營武備條戰守事宜天啓初遷太常少卿歸卒祀鄉賢弟亮思詳文苑子敏功貢生南谿訓導敏含舉人浙江新城知縣俱能詩敏師詳忠義李甘來字季子觀子萬曆甲辰武進士授岳州守備洞庭湖有巨盜為民害先是備兵者受賂容隱甘來至亦受之且厚其賜盜大喜一日甘來至其營解衣痛飲約為兄弟翼日邀盜

飲預伏壯士甘來酒盡數石盜魁皆沈醉伏起羣盜盡縛隨搗其巢無一脫者遂擢浙江遊擊弟大來字枕參萬曆庚子武舉授南澳廣營千總降海寇黃育一調潮州中營守備鍾林秀據九連山為亂大來搗平之功甚偉林秀挾致生員數十名大來力為申雪以疾告歸崇禎十年立砦獨山頂寇屢攻不克鄉人悉獲保全

胡士容字仁常應中子萬曆庚戌進士授長洲知縣捕豪惡築婁江石塘政聲丕著調嘉定請徵折色省轉輸費鉅萬遷薊州參議魏黨崔呈秀薊人也薦其倡姬弟為材官怫然絕之有姦賊吏捕急投崔氏第竟取論如法郡邑為魏忠賢立生祠士容禁不許遷江西副使忠賢黨誣以多乘驛馬侵盜倉

儲逮鎮撫獄掠治擬賊七千論死薊及長洲民間之咸輸餼以代崇禎初乃獲釋補陝西副使遷參政卒贈太僕卿祀鄉賢子崙字是恭諸生長七尺膂力過人嘗隨父任往來秦晉閒相地勢講求戰具崇禎五年阿害囊素入寇崙從軍力戰敗賊於甘又敗於涼御史上諸將士功皆議敘適士容卒崙扶櫬南歸服闋僅授蘄州衛百戶世襲明史附耿如杞傳參芝在堂集

金之純字健之萬曆乙卯舉人補浙川知縣以治績擢興安知州流賊突至之純誓以身殉丁壯皆感激殊死守一歲中賊薄城者四糧盡將陷密檄旁郡遊擊唐通為援夜縋敢死士會襲之斬獲甚眾賊去民饑且疫設粥食調醫藥存活數千人擢知漢中府會疾卒年四十五興安人廟祀焉並祀鄉賢

之純篤於友誼江夏吳裕中劾丁紹軾語侵璫矯詔死杖下親故皆竄匿暴屍衢中之純獨臨其喪反其櫬於三千里外妻李氏有節操訓子德崇德嘉皆知名崇詳孝友嘉詳文苑張金和字汝節萬曆拔貢生由教職遷平武知縣始至值小河卒因府胥索賄滯糧聚詬太守金和單騎諭解之徐誅首惡藩掾令妾誨淫得吳商金又殺妾與商金和得情誅掾李藩父子殺人郡納賄欲脫之金和寘之法在邑三年政平訟理解組歸年八十六卒祀鄉賢子楚倬舉人孫仁熙詳文苑

劉近臣字亦棐父鳴卿有隱德嘗鬻產以濟人之近臣生有夙慧天啓甲子舉鄉試第一對策忤璫崇禎辛未始成進士授金谿知縣有能聲邑故多巨室有貴公子兄弟鬩訟院司累

訊弗能決近臣諭以孝友大義兩造誓服新二陸書院時課諸生其中考最邁疾卒艾南英為序其文集刻之

黃梅縣

於顯好讀書善騎射豁達多大節屢從太祖征伐有功官至前

軍都督僉事卒贈英山侯諡襄武縣志作武襄

潘文浩正統閒由歲貢任灌陽知縣至誠惻怛薄斂省役有虎

噬人為文禱城隍越三日虎伏死廟門毛萇若有笞杖痕嶺

獠姦黠素為民患不可制乃以恩誘其黨縛之降由是疆場

甯謐擢梧州知府卒祀鄉賢

鄧俊字偉人成化歲貢生任四川大足縣丞有善政民為立遺

愛碑卒祀鄉賢

韓璉成化丙午舉人任萬安訓導學問該博制行孤介士林宗

之後充雲南鄉試同考官得人稱盛卒祀鄉賢

邢纓字文甫成化丁未進士授常熟知縣會邑大水發藏賑之

活數萬人入為御史彈劾不避權貴劉瑾憚之遷雲南副使

卒於官祀鄉賢子寰自有傳

廖紀字惟修以九江衛籍登宏治乙丑進士由安吉知州累擢

工部郎中執法奉公多忤權貴出知延平府歷平陽皆有政

聲嘉靖五年晉廣西按察副使征思恩田州叛苗邁疾卒著

大學管窺一卷見朱彝尊經義考

陳言字萬言縣志作萬年正德丁卯舉人授泗州學正以躬行迪士

不謀謀拘詞藝遷都昌知縣以循良稱卒於官士民祠祀之

邢寰字伯宇正德戊辰進士上弭盜議稱旨超擢刑科給事中
 以犯顏諫諍為己任上呼為酸子禁中有所為輒問近侍曰
 邢酸子得無知乎時車駕將遠狩寰拜伏闕下遮阻乃從厚
 載門出太監畢真保宸濠孝行寰抗疏駁之世宗即位多所
 舉劾官終南昌知府祀鄉賢孫懋順自有傳明史附汪元錫傳參通志
 案寰以忤中貴謫廣德州判陞南昌知府宸濠謀不軌寰
 實首發其姦及卒世宗諭葬祭並御書龍牌以旌表之縣志
 石金字南仲正德辛未進士以御史按廣西值土官岑猛亂後
 姚鏞措置乖方部落復擾金與尚書王守仁共撫定之還臺
 數月與御史喻希禮皆以言皇嗣得罪金疏言陛下日萬
 幾經理勞瘁何若中涵太虛物來順應凡人才之用舍政事

之敷施始以九卿之詳度繼以內閣之機謀其弗協於中者
 付諸臺諫之公論陛下恭默凝神挈其綱領使精神內蘊根
 本充固則百斯男之慶自不期而至王守仁以首平逆藩繼
 靖大寇乃因疑謗泯其前勞大禮大獄諸臣久膺流竄困鬱
 既久物故已多望錄守仁功寬諸臣罪則太和之氣塞宇宙
 閒矣疏入帝震怒下詔獄謫戍宣城久之赦還卒隆慶初贈
 光祿少卿祀鄉賢先是張璁桂萼用事御史儲良材輩爭附
 之金獨侃侃不阿以是有名明史附薛侃傳
 案金風采凝峻與漢陽戴金有二金錚錚之譽江西副使
 胡世甯坐發宸濠姦狀逮獄舉朝噤莫敢言獨金力辨之

黃州府志卷之二十一
余慶字蔡江正德癸酉舉人初任浮梁知縣不數月舉案牒所未結者聽斷悉平後補建昌有豪民李玉成楊時茂盧充王寶等爲民患慶曰根莠不刈奚長嘉禾力爲翦除輿情允協凡事一以清正自矢後丁內艱歸卒

陳昉正德己卯舉人任淮安同知治事詳明張弛有法沐陽鹽城閒旱災昉煮糜散粟多所全活卒祀鄉賢

胡鳳字文明嘉靖丙戌進士授常熟知縣勦海寇侯金民得安堵遷廣州知府以廉惠稱晉威茂兵備副使適白草番煽亂

鳳俘其酋李保等以獻尋轉參政卒祀鄉賢

廣東名宦志

洪恩字汝承祖晟舉人爲永甯知縣崇祀名宦鄉賢恩嘉靖戊戌進士歷戶部員外郎督儲江西悉革常例犒邊羨餘皆詳

請歸公出爲衢州知府會倭寇熾恩設法擒其謀檄諭礦洞散其黨調任永昌寬洪慈祥時有洪母之頌擢太僕卿以疾歸

曹麟字汝祥學問宏博下筆輒數千言嘉靖庚戌進士任許州知州許比歲不登民多流亡麟到官問民俗疾苦以清滯獄儲倉廩廣招徠爲先務並建德星書院以課士政教大行會劇盜司尙照來寇麟登陴爲好語賊心易之渡濠薄城麟已令城濠皆盛沙壅上流俟賊半渡決水溺死無算賊遁走追至襄陽斬首數百陞戶部員外郎提督永平山海薊州等處邊餉又奉敕催漕運皆稱旨遷天津兵備副使整飭嚴明倭偵知相戒不敢犯以兩親並八旬告歸常與黃安耿定向

黃州府志卷之二十七
蕪州顧問顧闕黃岡王廷陳等講窮理盡性之學著有肖鶴
算老菊侶等集子飛由廩生中武舉嘗以籌兵三十六字衍
萬言策伏闕上之授兵部參謀後爲當路所沮抑鬱卒著有
說劍集小遊草等編

瞿晟字景明號蓮川嘉靖癸丑進士初授戶部主事行兌江西
釐正斗量公私稱便累擢郎中時討倭寇需餉急晟旦暮持
籌無遑沐飯凡三月餘鬚髮頓白遂盡得諸隱匿狀並舉芻
輓便計百餘條以獻上覽而韙之次第施行先是雲中軍乏
食朝廷發十萬往賑當事侵沒其半晟抗疏劾之當事銜恨
中諸分宜相嚴嵩嵩方忌華亭相徐階而晟故階所舉士遂
出知廣平府廣平比歲惡盜起饑民爭附之晟捐俸市粟賑

饑捕盜魁寘諸法羣盜皆股栗遁明年夏旱蝗晟以郡西南
之水紆折東北達直沽可建閘資蓄洩乃布廩鳩工成閘內
溉田三萬九千頃有奇復於下流鑿長渠三百里繞雞澤入
洛河瀉鹵皆成上腴又從黃梅召工人往治水車引水廣平
人始工桔槔時兵部尚書楊某奏晟有邊材可大用晉太僕
寺卿未行卒祀鄉賢子九思詳儒林參明史

段尙繡字毅菴嘉靖甲子舉人授秦興知縣卓著清廉聲行取
南監察御史時同鄉南糧解役以逋負留滯南都尙繡傾囊
濟之眾感德立碑邑西關外卒祀鄉賢

王夢麟字文郊性孝友萬曆癸酉舉人授彰明知縣居官不事
苛刻愛民如子三載解組歸安於貧約以終

石崑玉字楚陽萬曆庚辰進士授戶部主事督漕稱廉潔歷蘇州知府執法不阿時有石蘇州之目蘇人大學士申時行崑玉座師也其親串在籍者守令多伺意迎候崑玉恥之會時行舍中兒暨戚某橫里閉崑玉俱械繫治以法作書報時行時行爲優容手慰答之後擢大同巡撫時邊事孔棘卜失免請封未果崑玉開誠撫諭旋充使登壇宣封皆稽顙呼萬歲擢吏部侍郎爲忌者所尼告歸生平奏疏詩文爲一時冠著有齡山堂稿石蘇州集石居士詩刪行役紀聞卒祀鄉賢子有恆詳忠義有信詳孝友孫確自有傳礪詳忠義礪礪皆知名

汪可受字以虛號靜峯勳子萬曆庚辰進士授金華知縣有政

聲遷吉安知府修復白鷺書院以徵輸厲民造條編法遂爲永例督學山西陟布政使舉廉吏第一詔不次擢用歷官兵部侍郎總督薊遼親歷險阻修飭堡臺京陵賴以拱護因疾乞歸著有道心亭說下車草沒後子道春詣闕陳父勲績請卹典情詞懇款奉旨賜祭葬道春後官思恩知府亦有政聲鄒如穎字允貞萬曆戊子舉人以才學名家任遂安知縣歷官九載囊橐蕭然致政歸居深山讀書以老

邢懋順字祥卿寰孫萬曆乙未進士官刑部員外郎抑奔競止苞苴著知爾篇自勵會錄囚一時平反得活者數十人沒後貧無以殮葉相國向高輓詩有祥卿不愧真清吏之句孫秉鈞字和石順治丙戌舉人有才名爲仇家所傾死

石確字敦五有恆子崇禎辛未進士授丹徒知縣有善政調宜興值荆溪民變確詣鄉諭散其黨徐計擒首惡民得安堵一時名士若董其昌陳繼儒輩皆為詩歌紀其績以艱歸年饑平糶賑濟里人勒碑頌之

瞿罕字曰有諸生七歲能文父九思被冤流塞下罕年十二與兄甲重繭千里伏闕上書天下稱雙孝崇禎中薦辟授崖州知州以興教育才為己任罷崖黎月供米平閩人林八亂告歸民思慕之子道宏歲貢生讀書守禮不墜宗風嘗輯歷代遺書名曰瞿氏世業

崖州名宦志參楚紀

